



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Baukau
Jullu 2020

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 46

Artigu sira	Tipu Kazu	Númeru
Artigu 145 KP & Artigu 2, 3, no 35 letra (b) (LKVD)	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	29
Artigu 154 KP	Maus tratus ba kónjuje	4
Artigu 145 KP & Artigu 2, 3, 35 letra (b) LKVD no Artigu 20 (1), 2 (2 alinea f) Lei Nú. 5/2017	Ofensa ba integridade fízika simples ho natureza violénsia doméstika no arma brankas	1
Artigu 145 KP & Artigu 2, 3, 35 letra (b) LKVD no Artigu 157 KP	Ofensa ba integridade fízika simples ho natureza violénsia doméstika no ameasa	1
Artigu 259, 185 KP	Danu agravadu no violasaun ba domísiliu	1
Artigu 23, 138 KP & Artigu 32, konjuga ho Artigu 35(b) LKVD & Artigu 20 (1) no (2) Lei Nú. 5/2017	Tentativa omisídiu simples ho natureza violénsia doméstika no arma brankas	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste

PoBox: 275

Telefone: 3323883 | 77040735

Website: <http://jsmp.tl/>
info@jsmp.tl

Facebook: www.facebook.com/timorleste.jsmp

Twitter: @JSMPtl

Artigu 139 KP	Omisídiu agravadu	1
Artigu 19 (1) no Artigu 20 (1), 2(2) husi Lei Nú. 5/2017	Rama ambon no arma brankas	1
Artigu 244, 225 KP	Dezobediénsia no la halotuir obrigasaun alimentár	1
Artigu 2 Nú.1 (g) no 20 (1) husi Lei Nú. 5/2017	Armas brankas	1
Artigu 259 KP	Danu agravadu	1
Artigu 257 KP	Abuza konfiansa agravadu	1
Artigu 263, 260, 139 KP no Artigu 20 alinea 1 (b), 2 (f), artigu 2 (1 no 2) Lei Nú. 5/2017	Danu ho violénsia, inséndiu, omisídiu agravadu no arma brankas	1
Artigu 172, 173 alinea 1 (d) KP	Violasaun seksuál ho agravasaun	1
Artigu 137, 138 Kódigu Prosesu Sivíl (KPS)	Dúvida no reklamasaun, rejistu kona-ba autus nia entrega	1
Totál		46

2. Totál desizaun ne'ebé JSMP monitoriza: 42

Tipu desizaun	Artigu sira	Númeru desizaun
Suspensaun ba prizaun nia ezekusaun	Artigu 68 KP	26
Pena multa	Artigu 67 KP	9
Pena prizaun	Artigu 66 KP	2
Pena prizaun no absolve	Artigu 66 KP	1
Suspensaun ba prizaun nia ezekusaun no omologa	Artigu 68 KP	2
Admoestasaun	Artigu 82 KP	1
Absolve		1
Totál		42

3. Totál kazu sira ne'ebé adia tuir JSMP monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 4

B. Deskrisaun sumáriu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika no krime arma brankas

Nú. Prosesu : 0070/19. BCBCV

Kompozisaun Tribunál : Koletivu

Juis : Dra. Jumiaty Freitas, Dra. Sribuana da Costa no Dr. José Quintão Soares Celestino
Prokuradór : Dra. Remízia de Fátima da Silva
Defeza : Dr. Sidonio Maria Sarmiento
Desizaun : Pena prizaun tinan 3 suspende ba tinan 3

Iha 02 Jullu 2020, Tribunál Distritál Baukau prezide julgamentu leitura akordaun ba krime ofensa ba integridade fízika simples ho natureza violénsia doméstika no krime arma brankas ne'ebé envolve arguidu CF hasoru nia feen, iha Distritu Baukau.

Akuzasaun Prokuradór

Prokuradór akuza katak iha 25 Maiu 2019, iha oras tuku 01:00 madrugada, arguidu lori katana tuir lezada ba kuartu laran no bainhira atu taa lezada, katana nia tutun kona fali iha kurtina odamatan nian halo lezada hakfodak no atu hadau katana ne'e husi arguidu maibé katana nia tutun kona fali iha lezada nia liman fuan boot parte loos no kauza kanek ki'ik. Hafoin ne'e, arguidu tebe dala ida iha lezada nia kidan parte loos. Lezada hakilar no sira nia oan mane mak mai hadau tiha katana husi arguidu no lori ba subar tiha. Antes agresaun ne'e, arguidu husu etu atu han no lezada mós prepara hahan iha meja. Hafoin ne'e, lezada tama fali ba kuartu laran. Arguidu bolu lezada atu akompaña arguidu han maibé lezada la sai mai nune'e arguidu komete agresaun sira ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, artigu 52 (1 no 2 alinea l) KP kona-ba sirkunstánsia agravante jerál no konjuga ho artigu 2, 3(a), 35(b) no 36 LKVD no artigu 20 (1), 2 (2 alinea f) husi Lei Arma Brankas.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak depoisde akontesimentu sira di'ak malu fali perante autoridade lokal no família. Arguidu mós deklarata katak foin primeiravés mai hatan iha tribunál, promete sei la halo tan krime hasoru lezada ka membru família sira iha futuru no arguidu nu'udar agrikultór ho rendimentu ne'ebé la fiksi.

Entretantu, lezada kontinua konfirma faktu sira iha akuzasaun no konfirma mós ho arguidu nia deklarasaun katak depoisde akontesimentu sira di'ak malu fali perante autoridade lokal no família no to'o agora aguidu la halo ona agresaun hasoru lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no deklarasaun husi lezada. Mezmu sira di'ak malu ona maibé atu prevene krime ne'e akontese tan iha futuru, husu ba tribunál atu aplika pena prizaun fulan sia suspende ba tinan ida fulan neen.

Enkuantu defeza husu ba tribunál atu aplika pena ne'ebé kmaan liu ba arguidu tanba arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu lori katana tuir lezada ba kuartu laran no bainhira atu taa lezada, katana nia tutun kona fali iha kurtina odamatan nian, nune'e lezada hakfodak no atu hadau katana ne'e husi arguidu maibé katana nia tutun kona fali iha lezada nia liman fuan boot parte loos no kauza kanek ki'ik. Hafoin ne'e, arguidu tebe dala ida iha lezada nia kidan parte loos. Lezada hakilar no sira nia oan mane mak mai hadau tiha katana husi arguidu no lori ba subar tiha.

Bazeia ba faktu provadu sira ne'e no tetu mós sirkunstánsia sira hotu, tribunál kondena arguidu ho pena prizaun tinan tolu suspende ba tinan tolu.

2. Krime danu agravadu no violasaun ba domisíliu

Nú. Prosesu : 0130/19. BCBCV

Kompozisaun Tribunál : Koletivu

Juis : Dr. José Q. S. Celestino, Dra. Maria Modesta A. Viera no Dr. José Antóni
Jesus Escurial da Silva Faria

Prokuradór : Dr. Ambrósio Rangel Freitas

Defeza : Dr. Germano Guterres Ramos

Desizaun : Pena prizaun tinan 3 suspende ba tinan 3

Iha 02 Jullu 2020, Tribunál Distritál Baukau prezide julgamentu leitura akordaun ba krime danu agravadu no violasaun ba domisíliu ne'ebé envolve arguidu Juvinal Feliciano da Costa hasoru lezada Simoa Maria da Conceição, iha Suku Wailili, Sub-distritu Baukau, Distritu Baukau.

Akuzasaun Prokuradór

Prokuradór akuza katak iha 03 Novembru 2019, iha oras tuku 19:50 kalan, arguidu lori motor para iha lezada nia uma oin, arguidu hakilar no trata arguidu. Depoisde ne'e, arguidu tun husi motor ho kilat manu ida no baku dala rua iha lezada nia meja *billiard*. Arguidu kontinua tama ba lezada nia uma laran no estraga lezada nia armáriu no soe lezada nia roupa namkari iha uma laran. Billiard ne'e lezada sosa ho folin US\$1,200.00 no armáriu lezada sosa ho folin US\$50.00. Totál prejuizu ba estragu sira ne'e hamutuk US\$1,250.00.

Prokuradór akuza arguidu kontra artigu 259 (d) KP kona-ba danu agravadu ho moldura penál tinan 2 to'o tinan 8 no artigu 185 (1) KP kona-ba violasaun ba domisíliu ho moldura penál to'o tinan 3 ka multa.

Produsaun ba prova sira

Iha prosesu julgamentu, arguidu nega totalmente ba faktu sira iha akuzasaun no argumenta katak iha akontesimentu ne'e arguidu ho nia kolega naran Tilman mak hemu tua hamutuk iha kolega ne'e nia uma. Arguidu lanu todan nune'e arguidu nia kolega ne'e mak tula arguidu ba nia banin nia uma maibe to'o iha ne'eba arguidu hakilar hela deit. Ho nune'e Ofisial Polisia Suku (OPS) Wailili lori tiha arguidu ba detein iha sela Eskuadra Polisia Baukau Vila no liutiha loron rua polisia bolu fali arguidu ba iha Eskuadra Polisia Baukau no dehan ba arguidu katak arguidu mak uza kilat manu, maibe arguidu hatan nia la iha kilat manu no arguidu rasik la iha koñesimentu kona-ba problema ne'e.

Enkuantu lezada deklarata katak iha akontesimentu ne'e, lezada hamutuk ho nia oan na'in rua iha hela dapur laran no derrepente rona ema gas motor maka'as no lezada haree arguidu hakilar no trata lezada, tanba ta'uk lezada ho nia oan na'in rua ba hamrik tiha iha kamii okos no haree arguidu kaer kilat manu iha liman karuk no baku dala rua ba iha meja *billiard*. Lezada hatutan katak arguidu kaer mos samurai iha nia liman loos. Hafoin ne'e, arguidu tama ba lezada nia uma laran no estraga armariu no soe namkari lezada nia roupa. Tanba ne'e, lezada telefone ba OPS no la kleur OPS mai no tiru kedas gas nune'e arguidu halai husik hela kilat manu iha meja *billiard* leten no lezada mak foti entrega ba OPS.

Testemuña TdJ nu'udar lezada nia oan feto (iidade tinan 19) depoimenta katak momentu ne'e hamutuk ho nia alin no lezada iha dapur laran no derrepente rona arguidu hakilar no trata lezada, nune'e testemuña hamutuk ho nia alin no lezada ba hamrik tiha iha kamii okos no haree arguidu kaer kilat manu baku dala rua ba meja *billiard*. Enkuantu kona-ba arguidu kaer samurai tuir lezada nia deklarasaun, testemuña la haree.

Alegasaun final

Prokurador konsidera arguidu provadu komete krime ne'eba imputa ba arguidu, mezmua arguidu nega faktu sira, maibe iha akontesimentu ne'e arguidu ho kondisaun lanu, nune'e bazeia ba lezada nia deklarasaun no testemuña nia depoimentu, husu ba tribunál kondena arguidu ho pena prizaun tinan tolu suspende ba tinan tolu.

Enkuantu defeza haktuir katak iha akontesimentu ne'e arguidu ho kondisaun lanu no hakilar iha nia banin nia uma, nune'e OPS mai aseguara arguidu no lori ba iha sela polisia Baukau Vila. Defeza haktuir tan katak iha deklarasaun lezada no testemuña nian mos diferente, tanba lezada deklarata katak arguidu kaer kilat manu no samurai, enkuantu testemuña deklarata katak haree arguidu kaer deit kilat manu no la haree arguidu kaer samurai. Tanba ne'e, husu ba tribunál absolve arguidu husi prosesu nee.

Desizaun

Depoizde avalia faktu hotu, tribunál mantein ho akuzasaun prokurador nian no prova katak arguidu lori kilat manu baku dala rua iha lezada nia meja *billiard* no kontinua tama ba lezada nia uma laran no estraga lezada nia armariu inklui soe lezada nia roupa sira. Bazeia ba faktu provadu

sira ne'e no tetu mós sirkunstánsia sira hotu, tribunál kondena arguidu ho pena prizaun tinan tolu suspende ba tinan tolu.

3. Krime ofensa ba integridade fízika simples ho natureza violénsia doméstika

Nú. Prosesu : 0027/19. VQSIC
Kompozisaun Tribunál : Singulár
Juis : Dr. José Quintão Soares Celestino
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena prizaun fulan 3 suspende ba tinan 1

Iha 06 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu NdC hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 12 Setembru 2019, iha oras tuku 14:00 lokraik, arguidu rasta lezada nia fuuk husi uma laran sai ba liur. Hafoin foti au nia sanak no baku dala tolu iha lezada nia kotuk laran no baku dala ida iha lezada nia liman kabun parte loos. Antes agresaun ne'e, arguidu ho lezada diskute malu kona-ba arguidu haruka lezada atu ba to'os, maibé lezada lakohi ba nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak depoisde sai husi sela polísia di'ak malu fali ho lezada no to'o agora arguidu la baku ona lezada. Arguidu hatutan katak foin primeiravés mai hatan iha tribunál, promete sei la halo tan krime hasoru lezada ka membru família sira iha futuru no arguidu nu'udar agrikultór ho rendemintu ne'ebé la fiksu.

Alende ne'e lezada mós konfirma faktu hotu iha akuzasaun no deklara mós katak sira di'ak malu ona no moris hamutuk nafatin.

Alegasaun finál

Prokuradór konsidera arguidu provadu komete krime hasoru lezada bazeia ba arguidu nia deklarasaun no lezada nia konfirmasaun. Nune'e, atu prevene krime hanesan la akontese tan iha futuru, husu ba tribunál atu kondena arguidu ho pena prizaun tinan ida suspende ba tinan ida.

Enkuantu defeza husu ba tribunál atu aplika pena ne'ebé kmaan liu ba arguidu tanba arguidu konfesa faktu hotu iha akuzasaun, arrende ona ninia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu rasta lezada nia fuuk husi uma laran sai ba liur. Tribunál mós prova katak arguidu uza au nia sanak no baku dala tolu iha lezada nia kotuk laran no baku dala ida iha lezada nia liman kabun parte loos. Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ona ninia hahalok, primeiravés mai hatan iha tribunál no di'ak malu ona ho lezada, nune'e tribunál kondena arguidu ho pena prizaun fulan tolu suspende ba tinan ida.

4. Krime ofensa ba integridade fízika simples ho natureza violénsia doméstika

Nú. Prosesu : 0044/19. VQVQQ
Kompozisaun Tribunál : Singulár
Juis : Dr. José Quintão Soares Celestino
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena prizaun fulan 3 suspende ba tinan 1

Iha 06 Jullu 2020 Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DAF hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 20 Novembru 2019, iha oras tuku 12:00 meiodia, arguidu basa dala ida iha lezada nia kanuruk. Hafoin, foti ai baku dala ida iha lezada nia liman parte karuk no baku dala ida iha lezada nia kidan parte karuk. Antes agresaun ne'e, arguidu, lezada no mós sira nia família na'in rua halo hela serbisu iha to'os laran no arguidu haree ba lezada ho sira nia família na'in rua ne'e hamnasa, nune'e arguidu husu ba lezada "*nusa imi hamnasa?*," maibé lezada la hatan ka nonook deit, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklara katak depoisde akontesimentu ne'e sira di'ak malu fali. Arguidu mós promote sei la komete tan krime hanesan hasoru lezada ka membru família sira iha futuro, foin primeiravés mai hatan iha tribunál, forma ona família dezde tinan 1981, iha oan hamutuk sanulu resin ida no arguidu nu'udar agrikultór ho rendimentu ne'ebé la fiksu ne'ebé dala ruma tinan ida mak hetan osan US\$250.00.

Aleinde ne'e, lezada kontinua konfirma faktu hotu iha akuzasaun no dekara mós katak sira di'ak malu ona no arguidu la komete tan aktu krime hasoru lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirmasaun husi lezada. Tanba ne'e, husu ba tribunál atu kondena arguidu ho pena multa US\$30.00.

Enkuantu, defeza haktuir katak presiza tau konsiderasaun ba arguidu nia konfisaun, primeiravés mai hatan iha tribunál, arrepende ona ninia hahalok, di'ak malu ona ho lezada no arguidu mós kuaze tinan ida mak hetan osan maizumenus US\$250.00 nune'e arguidu la iha kapasidade finanseiru. Aleinde ne'e, arguidu ho lezada moris hamutuk tinan naruk nia laran no foin primeiravés halo agresaun hasoru lezada. Tanba ne'e, husu ba tribunál atu aplika pena admoestasaun ba arguidu.

Desizaun

Depoisde avalia faktu hotu, tribunál prova katak arguidu basa dala ida iha lezada nia kanuruk, foti ai baku dala ida iha liman parte karuk no baku dala ida iha kidan parte karuk. Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ona ninia hahalok, primeiravés mai hatan iha tribunál no di'ak malu ona ho lezada, nune'e tribunál kondena arguidu ho pena prizaun fulan tolu suspende ba tinan ida.

5. Krime ofensa ba integridade fízika simples ho natureza violénsia doméstika

Nú. Prosesu : 0003/19.VQOSU
Kompozisaun Tribunál : Singulár
Juis : Dr. José Gonçalves
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena prizaun tinan 1 suspende ba tinan 1 fulan 6

Iha 06 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 31 Janeiru 2019, iha oras tuku 16:00 lokraik, arguidu tuku dala rua iha lezada nia tilun-hun parte karuk rezulta ran. Arguidu mós dulas lezada nia fuuk no riba lezada ba rai. Antes agresaun ne'e, arguidu husu osan bolsu da mãe nian US\$2.00 ba lezada atu sosa *SDSB* maibé lezada la fó, nune'e arguidu halo agresaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok maski sira seidauk di'ak malu tanba lezada hela ona iha Dili. Arguidu hatutan katak sira forma família dezde tinan 1999, iha oan na'in lima no foin mak halo agresaun hasoru lezada.

Aleinde ne'e, lezada continua konfirma faktu sira iha akuzasaun no konfirma mós ho arguidu nia deklarasaun katak sira seidak di'ak malu, tanba depoisde akontesimentu lezada hela tiha iha Dili no fila liman hodi sustenta sira nia oan na'in rua ne'ebé hela ho lezada inklui na'in tolu ne'ebé hela ho arguidu. Lezada mós deklara katak to'o agora arguidu nunca buka lezada atu rezolve sira nia problema.

Alegasaun finál

Prokuradór haktuir katak arguidu konfesa faktu hotu iha akuzasaun no lezada konfirma ho faktu sira ne'e, nune'e konsidera arguidu provadu komete krime hasoru lezada. Prokuradór haktuir tan katak tuir loloos arguidu nu'udar aman buka tan osan ba nesesidade uma laran nian la'os husu fali osan bolsu da mãe nian hodi joga fali *SDSB*. Bazeia konsiderasaun sira ne'e, husu ba tribunál atu kondena arguidu ho pena prizaun tinan ida suspende ba tinan rua.

Iha parte seluk, defeza husu atu konsidera arguidu nia konfisaun iha produsaun ba prova sira, arrepende ona ninia hahalok, foin primeiravés mai hatan iha tribunál. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tuku dala rua iha lezada nian tilun-hun parte karuk, dulas lezada nian fuuk dulas no riba lezada ba rai. Tribunál tetu mós sirkunstánsia atenuante sira hanesan arguidu konfesa, arrepende ona ninia hahalok, primeiravés mai hatan iha tribunál no di'ak malu ona ho lezada, nune'e tribunál kondena arguidu ho pena prizaun tinan ida suspende ba tinan ida fulan neen.

6. Krime ofensa ba integridade física simples ho natureza violência doméstica

Nú. Prosesu	: 0004/19. VQSIC
Kompozisaun Tribunál	: Singulár
Juis	: Dr. José Gonçalves
Prokuradór	: Dr. Julio da Silva Correia
Defeza	: Dr. António Fernandes
Desizaun	: Pena multa US\$90.00

Iha 06 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 29 Janeiru 2019, iha oras tuku 21:00 kalan, arguidu tuku dala tolu iha lezada nian liman parte loos, tuku dala ida iha lezada nia liman parte karuk, kaer lezada riba ba rai no bainhira lezada iha rai arguidu continua tuku dala ida iha lezada nia hasan parte loos no tuku dala ida iha lezada nia hasan parte karuk. Antes ne'e, lezada ho arguidu diskute malu tanba

arguidu sempre sai hela de'it ho motor, nune'e lezada hadau tiha save motor husi arguidu no mosu agresaun sira ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós deklarata katak foin primeiravés halo agresaun hasoru lezada, di'ak malu ona ho lezada no promete iha futuru sei la baku tan lezada. Arguidu nu'udar negosiante fa'an manu no loke kioske ho rendimentu dala ruma to'o US\$500.00.

Aleinde ne'e, lezada kontinua konfirma faktu sira iha akuzasaun no konfirma mós ho arguidu nia deklarasaun katak sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun, maibé mezmú nune'e atu prevene krime ne'e akontese tan iha futuru no tetu mós ho arguidu nia rendimentu, husu ba tribunál kondena arguidu ba pena multa US\$180.00.

Enkuantu defeza husu ba tribunál atu aplika pena ne'ebé adekuaudu ba arguidu ho konsiderasaun sira mak hanesan arguidu nia konfisaun, primeiravés mai hatan iha tribunál, arrepende ona ninia hahalok no di'ak malu ona ho lezada.

Desizaun

Depoisde avalia faktu hotu, tribunál prova katak arguidu tuku dala tolu iha lezada nian liman parte loos, tuku dala ida liman parte karuk no kaer lezada riba ba rai. Tribunál mós prova katak bainhira lezada iha rai, arguidu tuku dala ida iha lezada nia hasan parte loos no tuku dala ida iha lezada nia hasan parte karuk. Bazeia ba faktu provadu sira no tetu mós sirkunstánsia sira hotu, tribunál kondena arguidu ho pena multa US\$90.00 ne'ebé arguidu sei selu kada lora US\$1.00 durante lora 90. Bainhira arguidu la selu pena multa ne'e, arguidu sei kumpri iha prizaun durante lora 60 nu'udar pena alternativa.

7. Krime ofensa ba integridade fízika simples ho natureza violénsia doméstika

Nú. Prosesu : 0008/19. VQWCB
Kompozisaun Tribunál : Singulár
Juis : Dra. Maria Modesta de Almeida Viera
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena prizaun fulan 6 suspende ba tinan 1

Iha 06 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AF hasoru nia inan, iha Munisípiu Vikeke.

Akuzasaun Prokuradór

Prokuradór akuza katak iha 10 Maiu 2019, iha oras tuku 07:00 dadeer, arguidu lori kanedok modo nian no baku dala ida iha lezada nia ulun rezulta kanek no ran. Kazu ne'e akontese bainhira arguidu tein hela iha dapur, tanba masin laiha arguidu husu masin ba lezada no lezada hatan katak "*buka iha dapur laran?*". Nune'e arguidu komete agresau ne'e.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(c), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak depoisde akontesimentu ne'e arguidu kumpri oras 24 iha sela polísia. Bainhira arguidu fila husi sela polísia, arguidu husu deskulpa ba lezada nu'udar nia inan. Arguidu mós deklara katak arrepende ninia hahalok ne'e no foin primeiravés mai hatan iha tribunál.

Aleinde ne'e, lezada kontinua konfirma faktu sira iha akuzasaun no deklara katak arguidu husu ona deskulpa ba lezada no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun, maibé atu prevene arguidu repete ninia hahalok ne'e iha futuru hasoru nia inan ne'ebé tuir loloos arguidu maka tenke tau matan, maibé pela kontrariu arguidu mak komete fali krime hasoru lezada, nune'e husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza husu ba tribunál aplika pena ne'ebé justu ba arguidu ho konsiderasaun sira katak arguidu konfesa ninia hahalok, arguidu foin primeiravés mai hatan iha tribunál, arrepende ona ninia hahalok no di'ak malu ona ho lezada.

Desizaun

Depoisde avalia faktu hotu, tribunál prova katak arguidu uza kanedok modo nian no baku dala ida iha lezada nia ulun. Bazeia ba faktu provadu sira ne'e hotu no tetu mós sirkunstánsia atenuante sira hanesan arguidu konfesa, arrepende ona ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

8. Krime ofensa ba integridade fízika simples ho natureza violénsia doméstika

Nú. Prosesu : 0020/19. VQSIC

Kompozisaun Tribunál : Singulár

Juis : Dra. Maria Modesta de Almeida Viera

Prokuradór : Dr. Ambrósio Rangel Freitas
Defeza : Dr. António Fernandes
Desizaun : Pena prizaun fulan 3 suspende ba tinan 1

Iha 06 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JSS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 18 Agostu 2019, iha oras tuku 20:30 kalan, arguidu ho kondisaun lanu no tuku dala ida iha lezada nia reen-toos no tuku dala ida iha lezada nia knosen.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak nia komete krime ne'e tanba bainhira fila husi halo uma, arguidu haree uma laran sabraut loos. Maski nune'e, arguidu deklara katak depoisde akontesimentu ne'e sira di'ak malu fali perante família rua no husu ona deskulpa ba lezada. Arguidu hatutan katak foin primeiravés mai hatan iha tribunál, arrepende ona nia hahalok no promete sei la baku tan lezada iha futuro.

Aleinde ne'e lezada kontinua konfirma faktu hotu iha akuzasaun no deklara katak depoisde akontesimentu ne'e sira di'ak malu fali no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada, nune'e atu prevene krime ne'e akontese tan iha futuro, husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza husu ba tribunál atu aplika pena ne'ebé adekuaudu ba arguidu bazeia ba sirkunstánsia atenuante sira hanesan arguidu foin primeiravés mai hatan iha tribunál no di'ak malu ona ho lezada.

Desizaun

Depoide avalia faktu sira ne'ebé prodús durante julgamentu, tribunál prova katak arguidu tuku dala ida iha lezada nia reen-toos no tuku dala ida iha lezada nia knosen. Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ona ninia hahalok, di'ak malu ona ho lezada no arguidu mak iha responsabilidade hodi sustenta família, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

9. Krime ofensa ba integridade fízika simples ho natureza violénsia doméstika

Nú. Prosesu : 0029/19. VQSIC
Kompozisaun Tribunál : Singulár
Juis : Dra. Maria Modesta de Almeida Viera
Prokuradór : Dr. Ambrosio Rangel Freitas
Defeza : Dr. António Fernandes
Desizaun : Pena multa US\$30.00

Iha 06 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AA hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 18 Novembru 2019, arguidu tebe dala ida iha lezada nia tilun-hun halo lezada monu tun no lezada nia ulun kona iha parede no rezulta kanek. Antes agresaun ne'e, arguidu nia avo feto husu tudik ba lezada no lezada hatan katak "*tudik haluha hela iha natar, atu foti, ba foti mesak*". Ho nune'e arguidu halo agresaun ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu hili direitu nonook. Entretantu lezada kontinua konfirma faktu sira iha akuzasaun no deklarata katak di'ak malu ona ho arguidu. Mezmu nune'e, lezada decide atu moris separa ho arguidu.

Alegasaun finál

Prokuradór haktuir katak mezmu arguidu hili direitu nonook maibé lezada kontinua konfirma faktu sira iha akuzasaun prokuradór nian, nune'e husu ba tribunál atu kondena arguidu ba pena multa US\$30.00.

Aleinde ne'e, defeza mós haktuir katak mezmu arguidu hili direitu nonook maibé lezada kontinua konfirma ho faktu sira iha akuzasaun no agora dadaun arguidu ho lezada moris separa ona. Tanba ne'e, husu ba tribunál fo pena ne'ebé bele garantia arguidu la repete nia hahalok ne'e iha futuru bainhira arguidu hola fali feto seluk.

Desizaun

Depoide avalia faktu sira ne'ebé prodús durante julgamentu, tribunál prova katak arguidu tebe dala ida iha lezada nia tilun-hun rezulta lezada monu no ulun kona parede. Bazeia ba faktu provadu sira ne'e inklui tetu sirkunstánsia sira hanesan arguidu no lezada separa ona, tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loraun durante loraun 30. Tribunál mós fiksa pena alternativa durante loraun 20 prizaun, bainhira arguidu la selu pena multa refere.

10. Krime ofensa ba integridade fízika simples ho natureza violénsia doméstika

Nú. Prosesu : 0019/19. VQWCB
Kompozisaun Tribunál : Singulár
Juis : Dra. Jumiaty Freitas
Prokuradór : Dr. Ambrósio Rangel Freitas
Defeza : Dr. António Fernandes
Desizaun : Pena multa US\$40.00

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violéncia doméstika ne'ebé envolve arguidu SdS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 19 Setembru 2019, iha oras tuku 17:25 lokraik, arguidu basa dala rua iha lezada nia ibun, tuku dala ida iha lezada nia tilun-hun no lori ai-sanak baku dala ida iha lezada nia liman parte loos. Antes agresaun ne'e, arguidu atu hemu tua maibé lezada la hatan, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarara katak arrepende ona ninia hahalok. Arguidu mós deklarara katak foin primeiravés mai hatan iha tribunál, depoisde akontesimentu di'ak malu fali ho lezada no to'o agora arguidu la baku ona lezada.

Aleinde ne'e, lezada mós konfirma faktu sira iha akuzasaun sein rezerva no deklarara katak depoisde akontesimentu ne'e sira di'ak malu ona to'o agora.

Alegasaun finál

Prokuradór konsidera arguidu provadu komete krime hasoru lezada. Aleinde ne'e, prokuradór argumenta katak Tribunál Distritál Baukau kuaze lor-loron julga kazu krime ho natureza violéncia doméstika no kondena ona arguidu barak maibé krime ne'e sempre aumenta ba beibeik. Bazeia ba konsiderasaun sira ne'e, husu ba tribunál atu kondena arguidu ba pena multa US\$30.00.

Aleinde ne'e, defeza entrega ba tribunál atu tetu faktu sira hotu no deside pena ne'ebé justu ba arguidu ho konsiderasaun sira ba arguidu nia konfisaun, arrependimentu, primeiravés mai hatan iha tribunál no arguidu hakarak di'ak malu fali ho lezada.

Desizaun

Depoide avalia faktu sira hotu, tribunál prova katak arguidu basa dala rua iha lezada nia ibun, tuku dala ida iha lezada nia tilun-hun no lori ai-sanak baku dala ida iha lezada nia liman parte loos. Bazeia ba faktu provadu sira no tetu mós sirkunstánsia atenuante sira hanesan arrepende ninia hahalok, primeiravés mai hatan iha tribunál no nu'udar ema ne'ebé mak iha responsabilidade hodi

sustenta família, nune'e tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu US\$1.00 kada lora durante lora 40. Tribunál mós fiksa pena alternativa durante lora 30 prizaun, bainhira arguidu la selu pena multa refere.

11. Krime ofensa ba integridade física simples ho natureza violência doméstica

Nú. Prosesu : 0028/19. VQSIC
Kompozisaun Tribunál : Singulár
Juis : Dra. Jumiaty Freitas
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena multa US\$45.00

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu DSP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 14 Novembru 2019, iha oras tuku 16:40 lokraik, lezada husu ajuda ba arguidu atu tula hela lezada nia inan ba ospital, maibe arguidu rejeita tanba lanu. Ho nune'e arguidu ho lezada diskute malu no arguidu tuku dala rua lezada nian ulun parte kotuk, tuku dala rua iha kotuk laran no tuku dala rua iha liman kabun parte karuk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak depoisde akontesimentu ne'e di'ak malu fali ho lezasa perante familia rua. Arguidu mós deklarata katak foin primeiravés mai hatan iha tribunál, arrepende ninia hahalok no promete sei la baku tan lezada iha futuro. Arguidu hatutan katak arguidu nu'udar agrikultór no rezultadu hodi sustenta deit ba familia.

Aleinde ne'e, lezada kontinua konfirma faktu sira iha akuzasaun no deklarata katak depoisde akontesimentu ne'e sira di'ak malu fali no to'o agora arguidu la baku ona lezada.

Alegasaun final

Prokuradór haktuir katak arguidu konfesa faktu ne'ebé nia komete no konfirma mós husi lezada, nune'e husu ba tribunál atu kondena arguidu ho pena multa US\$30.00 nu'udar prevensaun ida ba arguidu atu la repete tan krime hanesan iha futuro.

Entretantu, defeza husu ba tribunál atu aplika pena admoestasaun ba arguidu bazeia ba sirkunstánsia atenuante sira hanesan arguidu foin primeiravés mai hatan iha tribunál, arrepende ona ninia hahalok no nu'udar agrikultór ne'ebé sai mós sustentadór prinsipal ba familia.

Desizaun

Depoide avalia faktu sira hotu, tribunál prova katak arguidu tuku dala rua iha lezada nianulun parte kotuk, tuku dala rua iha kotuk laran no tuku dala rua iha liman kabun parte karuk. Bazeia ba faktu provadu sira no tetu mós sirkunstánsia atenuante sira hanesan arguidu arrepende ninia hahalok, promete sei la repete iha futuru, primeiravés mai hatan iha tribunál no nu'udar ema ne'ebé mak iha responsabilidade hodi sustenta família, tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$1.00 kada loron durante loron 45. Bainhira arguidu la selu pena multa ne'e arguidu sei kumpri iha prizaun durante loron 30 nu'udar pena alterativa.

12. Krime ofensa ba integridade fízika simples ho natureza violénsia doméstika

Nú. Prosesu : 0002/20. VQVQQ
Kompozisaun Tribunál : Singulár
Juis : Dra. Jumiaty Freitas
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena multa US\$40.00

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 01 Janeiru 2020, iha oras tuku 20:00 kalan, arguidu ho kondisaun lanu hakilar iha sira nia uma oin, nune'e lezada ba hakalma tiha maibé arguidu dudu lezada no haruka lezada ba halot nia roupa hodi sai husi uma. Bainhira lezada tama ba kuartu laran, arguidu tuir lezada no tuku dala ida iha lezada nia matan fukun parte karuk no basa dala ida iha lezada nia knosen.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu mós deklara katak depoisde akontesimentu ne'e sira di'ak malu fali, foin primeiravés mai hatan iha tribunál no promete iha futuru sei la komete tan aktu hanesan hasoru lezada. Arguidu hatutan katak arguidu nu'udar agrikultór no nia rezultadu hodi sustenta deit ba família.

Aleinde ne'e, lezada mós konfirma faktu sira iha akuzasaun no deklara katak depoisde akontesimentu ne'e liu tiha fulan ida, sira di'ak malu fali no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu ne'ebé nia komete no lezada mós konfirma, nune'e husu ba tribunál atu kondena arguidu ho pena multa US\$30.00 nune'e bele prevene arguidu la komete tan ninia hahalok iha futuru.

Entretantu, defeza husu ba tribunál atu aplika pena admoestasaun ba arguidu bazeia ba sirkunstánsia atenuante sira hanesan arguidu konfesa, arrepende ninia hahalok, arguidu foin primeiravés mai hatan iha tribunál, arguidu la repete ninia hahalok ne'e no arguidu nu'udar agrikultór ne'ebé sai sustentadór prinsipál ba família.

Desizaun

Tribunál prova katak arguidu tuku dala ida iha lezada nia matan fukun parte karuk no basa dala ida iha lezada nia knosen. Bazeia ba faktu provadu sira no tetu mós sirkunstánsia atenuante sira, tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0.50 kada lora durante lora 60. Tribunál mós fiksa pena alternativa durante lora 40 prizaun, bainhira arguidu la selu pena multa refere.

13. Krime ofensa ba integridade fízika simples ho natureza violénsia doméstika

Nú. Prosesu : 0001/19. VQSIC
Kompozisaun Tribunál : Singulár
Juis : Dra. Sribuana da Costa
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena prizaun fulan 6 suspende ba tinan 1

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JN hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 20 Dezembru 2019, iha oras tuku 12:00 meiodia, lezada toba dukur hela iha kuartu laran. Arguidu mai ho kondisaun lanu no tuku dala haat iha lezada nia kotuk laran, tuku dala haat iha lezada nia kabun parte loos no karuk, tuku dala rua iha hirus-matan. Lezada hader husi kama no ba tuur tiha iha kadeira, maibé arguidu kontinua halo agresaun basa dala rua iha lezada nia hasan parte loos no karuk no tuku dala rua iha lezada nia kabun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok ne'e. Arguidu mós deklara katak depoisde akontesimentu ne'e liu lora tolu arguidu

husu deskulpa no di'ak malu fali ho lezada no promete iha futuru sei la baku tan lezada. Arguidu hatutan katak arguidu nu'udar agrikultór ne'ebé rezultadu husi nia serbisu ne'e hodi sustenta deit família.

Aleinde ne'e, lezada mós kontinua konfirma faktu sira iha akuzasaun no deklara katak depoisde liu tiha loron tolu sira di'ak malu fali no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu ne'ebé nia komete no konfirma mós husi lezada, tanba ne'e husu ba tribunál atu kondena arguidu ho pena prizaun tinan ida suspende ba tinan ida. Entretantu, defeza husu husu ba tribunál atu aplika pena ne'ebé kmaan liu ba arguidu tanba arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu tuku dala haat iha lezada nia kotuk laran, tuku dala haat iha lezada nia kabun parte loos no karuk no tuku dala rua iha lezada nia hirusmatan. Tribunál mós prova katak arguidu basa dala rua iha lezada nian hasan parte loos no karuk no tuku dala rua iha lezada nia kabun.

Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ninia hahalok, promete sei la repete iha futuru, primeiravés mai hatan iha tribunál no nu'udar ema ne'ebé mak iha responsabilidade hodi sustenta família, nune'e tribunál konklui prosesu ne'e no kondena arguidu ba pena prizaun fulan neen suspende ba tinan ida.

14. Krime ofensa ba integridade fízika simples ho natureza violénsia doméstika

Nú. Prosesu : 0023/19. VQWCB
Kompozisaun Tribunál : Singulár
Juis : Dra. Sribuana da Costa
Prokuradór : Dr. Julio da Silva Correia
Defeza : Dr. Sidonio Maria Sarmento
Desizaun : Pena prizaun fulan 6 suspende ba tinan 1

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MdS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak, iha 14 Novembru 2019, iha oras tuku 22:00 kalan, arguidu dada tun lezada husi kama leten no tebe dala rua iha lezada nia kotuk laran, tuku dala rua iha lezada nia kabun, tuku dala rua iha lezada nia ulun no tuku dala ida iha lezada nia knosen. Antes agresaun

ne'e, arguidu fila ho kondisaun lanu no diskute malu ho lezada, tanba lezada diskonfia arguidu amante ho fetu seluk.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa totalmente faktu sira sein rezerva no deklara katak arrepende ninia hahalok. Arguidu mós promete sei la repete ninia hahalok ne'e hasoru lezada iha futuru. Arguidu hatutan katak depoisde akontesimentu ne'e liutiha loron tolu sira d'iak malu fali perante família. Aleinde ne'e, arguidu mós dehan katak sira forma família desde 2003, iha oan na'in neen, foin primeiravés halo agresaun hasoru lezada no arguidu nu'udar agrikultór ne'ebé rezultadu sustenta deit família.

Nune'e mós lezada kontinua konfirma faktu hotu iha akuzasaun no deklara katak liu loron tolu sira di'ak malu fali perante família sira no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu sira iha akuzasaun no lezada mós konfirma akuzasaun. Ho nune'e, mezmu sira di'ak malu ona maibé nafatin tau prevensaun aas nune'e bele eduka comunidade sira seluk katak krime violénsia doméstika ne'e krime públiku no se deit mak halo agresaun hasoru nia membru família tenke hetan kastigu tuir lei. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida.

Aleinde ne'e defeza haktuir katak presiza tau konsiderasaun ba arguidu nia konfisaun iha produsaun ba prova sira, primeiravés mai hatan iha tribunál, arrepende ninia hahalok, di'ak malu ona ho lezada. Tanba ne'e, husu ba tribunál aplika pena ne'ebé kmaan liu ba arguidu.

Desizaun

Depoisde avalia faktu hotu, tribunál prova katak arguidu tebe dala rua iha lezada nia kotuk laran, tuku dala rua iha lezada nia kabun, tuku dala rua iha ulun no tuku dala ida iha lezada nia knosen. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no nu'udar ema ne'ebé mak iha responsabilidade hodi sustenta família, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

15. Krime ofensa ba integridade fízika simples ho natureza violénsia doméstika

Nú. Prosesu	: 0017/19. VQWTL
Kompozisaun Tribunál	: Singulár
Juis	: Dr. José Quintão Soares Celestino
Prokuradór	: Dr. Ambrósio Rangel Freitas
Defeza	: Dr. Antonio Fernandes
Desizaun	: Pena prizaun fulan 6 suspende ba tinan 1

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ML hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 14 Agostu 2019, iha oras tuku 09:30 dadeer, arguidu tuku dala ida iha lezada nia tilun-hun parte loos, tebe dala ida iha lezada nia kabun, riba lezada ba rai no sama iha lezada nia ulun. Antes agresaun ne'e, arguidu ho lezada diskute malu kona-ba arguidu deskonfia lezada ho mane seluk, nune'e bainhira lezada atu lori labarik ba Sentru Saúde hodi konsulta, arguidu la hatan.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak arguidu la hatan bainhira lezada dehan atu ba Dili no la'os impede lezada atu lori sira nia oan ba konsulta iha sentru saúde. Enkuantu kona-ba agresaun sira ne'e arguidu konfesa. Arguidu mós deklara katak foin primeiravés halo agresaun hasoru lezada, depoisde akontese di'ak malu fali ona ho lezada, arrepende ninia hahalok no forma família hahu iha 2018,

Entretantu lezada kontinua konfirma faktu hotu iha akuzasaun no deklara katak depoisde akontesimentu ne'e di'ak malu fali ona ho arguidu no arguidu husu ona deskulpa ba lezada no to'o agora arguidu la baku ona lezada.

Alegasaun finál

Prokuradór haktuir katak iha produsaun ba prova, arguidu koko atu nega motivu husi akontesimentu ne'e, maibé lezada kontinua konfirma no arguidu mós konfirma ho agresaun sira ne'ebé mak arguidu komete hasoru lezada. Nune'e atu prevene krime hanesan akontese tan iha futuru, husu ba tribunál atu kondena arguidu ho pena prizaun tinan ida suspende ba tinan rua.

Enkuantu, defeza husu ba tribunál atu fó pena ne'ebé justu ba arguidu ho konsiderasaun sira katak arguidu arrepende ona ninia hahalok no di'ak malu ona ho lezada. Tanba ne'e, husu ba tribunál aplika pena ne'ebé justu hodi garantia sira nia moris iha futuru.

Desizaun

Depoisde avalia faktu hotu, tribunál prova katak arguidu tuku dala ida iha lezada nia tilun-hun parte loos, tebe dala ida iha lezada nia kabun, riba lezada ba rai no sama lezada nia ulun. Bazeia ba faktu provadu sira no tetu mós sirkunstánsia atenuante sira hanesan arguidu arrepende ona ninia hahalok no di'ak malu ona ho lezada, tribunál konklui prosesu ne'e no kondena arguidu ho pena prizaun fulan neen suspende ba tinan ida.

16. Krime ofensa ba integridade fízika simples ho natureza violénsia doméstika

Nú. Prosesu : 0043/18. VQWCB
Kompozisaun Tribunál : Singulár
Juis : Dra. Jumiaty Freitas
Prokuradór : Dr. Ambrósio Rangel Freitas
Defeza : Dr. Sidonio Maria Sarmiento
Desizaun : Pena multa US\$30.00

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 05 Dezembru 2018, iha oras tuku 08:00 dadeer, arguidu tuku dala tolu iha lezada nia ulun, tebe dala ida iha lezada nia kidan no basa dala ida iha lezada nia kakorok.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ona nia hahalok ne'e. Arguidu mós deklara katak foin primeiravés halo agresaun hasoru lezada, perante família di'ak malu ona ho lezada no promete sei la komete tan krime hasoru lezada.

Aleinde ne'e, lezada mós konfirma faktu sira iha akuzasaun no deklara katak depoisde akontesimentu ne'e sira di'ak malu fali perante família rua no to'o agora arguidu la baku ona lezada.

Alegasaun finál

Prokuradór haktuir katak iha produsaun prova sira, arguidu konfesa faktu hotu ne'ebé prokuradór akuza ba arguidu no konfirma mós husi lezada, tanba ne'e husu ba tribunál kondena arguidu ho pena multa.

Enkuantu defeza husu ba tribunál atu aplika pena ne'ebé kmaan ba arguidu ho konsiderasaun sira katak arguidu konfesa, arrepende ninia hahalok no promete sei la komete tan krime hasoru lezada. Arguidu mós foin primeiravés halo agresaun hasoru lezada no perante família di'ak malu ona ho lezada.

Desizaun

Depoisde avalia faktu hotu, tribunál prova katak arguidu tuku dala tolu iha lezada nia ulun, tebe dala ida iha lezada nia kidan no basa dala ida iha lezada nia kakorok. Bazeia ba faktu provadu

sira ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok, promete sei la komete tan krime hasoru lezada, foin primeiravés halo agresaun hasoru lezada no depoisde akontesimentu ne'e perante família di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loraun durante loraun 30. Tribunál mós fiksa pena alternativa durante loraun 20 prizaun, bainhira arguidu la selu pena multa refere.

17. Krime ofensa ba integridade física simples ho natureza violência doméstica no ameasa

Nú. Prosesu : 0023/19. VQWTL
Kompozisaun Tribunál : Singulár
Juis : Dra. Sribuana da Costa
Prokuradór : Dra. Remizia de Fátima da Silva
Defeza : Dr. Germano Guterres Ramos
Desizaun : Omologa no pena prizaun fulan 3 suspende ba tinan 1

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade física simples ho natureza violência doméstica no ameasa ne'ebé envolve arguidu AdS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 18 Outubru 2019, iha oras tuku 07:00 dadeer, arguidu tebe dala rua iha lezada nia kabun, tebe dala ida iha lezada nia kakorok parte loos no lori ai-sanak baku dala ida iha lezada nia kabaas parte loos. Arguidu mós dehan ba lezada katak nia sei halo agresaun bei-beik hasoru lezada. Tanba ne'e lezada sente tauk ho arguidu ninia ameasa ne'e. Antes agresaun ne'e, arguidu atu mai Dili nune'e arguidu nian inan fó osan US\$50.00 ba arguidu no arguidu kontinua husu mós osan ba arguidu nia aman, tanba ne'e lezada dehan ba aguidu katak "*ohin ama fó ona osan nusa mak sei husu tan fali apa*". Nune'e arguidu halo agresaun ne'e hasoru lezada. Depoisde akontesimentu ne'e, lezada ho oan sira ba hela tiha iha nia inan-aman ninia uma.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD no kontra artigu 157 KP kona-ba ameasa ho moldura penál to'o tinan 2 ka multa.

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa konsiliaun, tribunál halo tentativa konsiliaun ba arguidu ho lezada relasiona ho krime ameasa tanba kazu ne'e nu'udar krime semi-públiku no nia prosedimentu depende ba keixa.

Iha prosesu konsiliaun ne'e, lezada hakarak deziste tiha nia keixa hasoru arguidu no arguidu mós konkorda ho pedidu ne'e. Bazeia ba konkordansia husi parte rua, tribunál omologa tiha dezisténsia keixa ne'e. Entretantu krime ofensa ba integridade fizika simples ho natureza violénsia doméstika, tribunál kontinua hala'o prosesu julgamentu.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak arrpende ninia hahalok. Arguidu mós deklara katak foin primeiravés halo agresaun hasoru lezada no promete sei la komete tan krime hanesan hasoru lezada iha futuru. Arguidu hatutan katak depoisde akontesimentu ne'e arguidu detein iha sela polísia durante oras 24 no bainhira arguidu fila ba uma, lezada ho labarik sira ba hotu ona lezada nia inan-aman nia uma. Atu evita problema seluk nune'e arguidu la ba tuir bolu lezada no labarik sira, mezmu nune'e arguidu nafatin hakarak moris hamutuk ho lezada no oan sira.

Aleinde ne'e, lezada mós konfirma faktu sira iha akuzasaun no deklara katak sei hakarak nafatin moris hamutuk ho arguidu maibé importante mak arguidu la bele repete tan ninia hahalok ne'e iha futuru.

Alegasaun finál

Prokuradór haktuir katak arguidu konfesa faktu hotu iha akuzasaun, nune'e konsidera arguidu provadu komete krime hasoru lezada. Tanba ne'e, husu ba tribunál kondena arguidu tuir krime ne'ebé arguidu komete.

Entretantu defeza husu ba tribunál atu aplika pena ne'ebé justu no adekuadu ba arguidu ho konsiderasaun sira ba arguidu nia konfisaun, primeiravés hatan iha tribunál no arrepende ona ninia hahalok.

Desizaun

Depoisde avalia faktu hotu, tribunál prova katak arguidu tebe dala rua iha lezada nia kabun, tebe dala ida iha lezada nia kakorok parte loos no lori ai-sanak baku dala ida iha lezada nia kabaas parte loos. Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ona ninia hahalok no promete sei la repete ninia hahalok, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

18. Krime ofensa ba integridade fízika simples ho natureza violénsia doméstika

Nú. Prosesu	: 0010/19. VQSIC
Kompozisaun Tribunál	: Singulár
Juis	: Dra. José Gonçalves
Prokuradór	: Dra. Remizia de Fátima da Silva
Defeza	: Dr. António Fernandes

Desizaun

: Pena prizaun fulan 8 suspende ba tinan 1

Iha 07 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DQS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 11 Abril 2019, iha oras tuku 21:00 kalan, arguidu basa dala ida iha lezada nia hasan parte loos no basa dala ida iha lezada nia hasan parte karuk halo lezada monu ba rai. Aarguidu mós tebe dala rua iha lezada nia kotuk laran. Antes agresaun ne'e, arguidu haruka sira nia oan feto boot ba treinu motor, nune'e lezada dehan ba arguidu katak "*labarik sei ki'ik la bele lai treinu motor*" nune'e arguidu ho lezada diskute malu no arguidu komete agresaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok ne'e. Arguidu mós deklara katak depoisde akontesimentu ne'e liu tiha loron tolu sira di'ak malu fali. Arguidu hatutan katak arguidu nu'udar xefe aldeia no halo mós atividade agrikultura nian no rezultadu sustenta de'it ba família.

Aleinde ne'e, lezada mós konfirma faktu sira iha akuzasaun no konfirma ho arguidu nia deklarasaun. Lezada mós deklara katak to'o agora arguidu la baku ona lezada.

Alegasaun finál

Prokuradór konsidera arguidu provadu komete krime hasoru lezada ne'ebé tuir loloos arguidu tenke konsidera lezada nia pedidu kona-ba fó protesausun ba labarik ne'ebé idade sei menor, la'os responde fali ho violénsia. Nune'e atu asegura arguidu hases-an husi nia hahalok ne'ebé gosta uza violénsia iha futuru, husu ba tribunál atu kondena arguidu tuir krime ne'ebé nia komete.

Aleinde ne'e, defeza haktuir katak presiza tau konsiderasaun ba arguidu nia konfisaun, primeiravés hatan iha tribunál, arrepende ona ninia hahalok no di'ak malu ona ho lezada. Tanba ne'e, husu ba tribunál aplika pena ne'ebé justu no adekuadu ba arguidu.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte loos no basa dala ida iha lezada nia hasan parte karuk resulta lezada monu ba rai. Tribunál mós prova katak arguidu tebe dala rua iha lezada nia kotuk laran. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok,

primeiravés hatan iha tribunál, di'ak malu ona ho lezada no arguidu mak sustenta família, nune'e tribunál konklui prosesu ne'e no kondena arguidu ho pena prizaun fulan ualu suspende ba tinan ida.

19. Krime ofensa ba integridade física simples ho natureza violência doméstica

Nú. Prosesu : 0013/19. VQWCB
Kompozisaun Tribunál : Singulár
Juis : Dr. José Quintão Soares Celestino
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena prizaun fulan 6 suspende ba tinan 1

Iha 08 Jullu 2020, Tribunál Distritál Baukau liuhusi julgamentu movel iha Munisípiu Vikeke prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu FD hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 13 Jullu 2019, iha oras tuku 07:30 dadeer, arguidu basa dala ida iha lezada nia kanuruk no kaer lezada nia kakorok riba ba rai. Hafoin uza ain tuur fai lezada nia knosen. Antes agresaun ne'e, arguidu atu ba natar, lezada ba dapur prepara hela hahan no arguidu haree manu han estraga tiha fos, nune'e arguidu ho lezada diskute malu no mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun. Mezmu nune'e, arguidu deklara katak arrepende ninia hahalok no promete iha futuru sei la baku tan lezada. Arguidu hatutan katak sira forma família iha tinan 2000, iha oan na'in lima no foin primeiravés baku lezada, depoisde akontesimentu ne'e sira di'ak malu fali, arguidu nu'udar peskadór ne'ebé fulan ida bele hetan osan US\$100.00.

Nune'e mós lezada kontinua konfirma faktu sira iha akuzasaun no deklara katak depoisde akontesimentu ne'e sira di'ak malu fali no to'o agora arguidu la baku ona lezada.

Alegasaun finál

Prokuradór haktuir katak la'os lezada mak husik manu ba han fos maibé manu mesak mak ba han. Devia-ser arguidu la tau kulpa fali ba lezada no kontinua halo agresaun hasoru lezada. Prokuradór hatutan katak arguidu nia konduta ne'e prenze rekezitu krime ne'ebé imputa ba nia. Tanba ne'e, husu ba tribunál kondena arguidu ba pena multa US\$ 40.00.

Enkuantu defeza husu ba tribunál atu aplika pena ne'ebé justu no adekuaudu ba arguidu ho konsiderasaun ba arguidu nia konfisaun, arependimentu ba ninia hahalok no di'ak malu ona ho lezada.

Desizaun

Depoisde avalia faktu hotu, tribunál prova katak arguidu basa dala ida iha lezada nia kanuruk, kaer lezada nia kakorok no riba ba rai no uza ain tuur fai lezada nia knosen. Bazeia ba faktu provadu sira no tetu mós ho sirkunstánsia atenuante sira hanesan arguidu konfesa, arrepende ona ninia hahalok no di'ak malu ona ho lezada no nu'udar ema ne'ebé mak iha responsabilidade hodi sustenta família, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

20. Krime maus-tratus ba kónjuje

Nú. Prosesu : 0015/19. VQSIC
Kompozisaun Tribunál : Koletivu
Juis : Dra. Jumiaty M. Freitas, Dr. José Q.S Celestino no Dr. José A. J. E. S. Faria
Prokuradór : Dr. Ambrósio Rangel Freitas
Defeza : Dr. António Fernandes
Desizaun : Pena prizaun tinan 2 fulan 6 suspende ba tinan 3

Iha 08 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura akordaun ba krime maus-tratus ba kónjuje ne'ebé envolve arguidu CdS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 18 Juñu 2019, lezada ne'ebé nu'udar funsionáriu públiku sei serbisu hela iha nia edifísiu. Arguidu ezije ba lezada atu fila ona ba uma mezmú sei iha hela oras serbisu. Lezada rejeita fila ba uma, nune'e arguidu ba iha lezada nia serbisu fatin no basa dala lima iha lezada nia hasan parte loos no karuk. Tuir mai, iha 22 Juñu 2019, iha oras tuku 08:00 dadeer, arguidu husu lezada nia telemovel ne'ebé foin sosa ho folin US\$45.00. Lezada hakarak fó ba arguidu uza maibé arguidu tenke fó fali osan ho montante refere ba lezada. Maibé arguidu la konkorda no arguidu bolu lezada ba kuartu laran no basa dala ida ha lezada nia ulun parte karuk, tuku dala ida iha lezada nia matan fukun parte karuk no rakut lezada nia hasan.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa parsialmente katak faktu iha 18 Juñu 2019, arguidu basa dala ida de'it iha lezada nia hasan parte loos. Entretantu, faktu iha 22 Juñu 2019, arguidu basa de'it dala rua iha lezada nia ulun parte karuk. Arguidu hatutan katak foin primeiravés mai hatan iha tribunál, di'ak malu ona ho lezada, arrepende ninia hahalok no promete sei la halo tan agresaun hanesan hasoru lezada no membru família sira seluk.

Entretantu lezada deklara katak akontesimentu iha lezada nia serbisu fatin, arguidu basa dala ida iha lezada nia hasan parte loos. Kona-ba akontesimentu segundu, lezada kontinua konfirma ho faktu sira iha akuzasaun. Lezada mós deklara katak depoisde akontesimentu ne'e, sira di'ak malu fali ona no to'o agora arguidu la baku ona lezada.

Alegasaun finál

Prokuradór haktuir katak arguidu konfesa parsialmente tanba de'it sira di'ak malu ona no hakarak salva malu. Ho nune'e, prokuradór nafatin mantein ho akuzasaun no husu ba tribunál atu kondena arguidu ho pena prizaun tinan rua fulan neen suspende ba tinan tolu.

Enkuantu defeza haktuir katak arguidu deklara deit faktu ne'ebé nia komete no konfirma mós husi lezada katak depoisde akontesimentu ne'e sira dia'k malu fali no arrepende ona ninia hahalok. Tanba ne'e, husu ba tribunál aplika pena ne'ebé adekuaudu ba arguidu.

Desizaun

Depoisde avalia faktu hotu, tribunál prova katak arguidu basa dala ida iha lezada nian hasan. Tribunál mós prova katak arguidu basa dala ida iha lezada nia ulun parte karuk, tuku dala ida iha lezada nia matan fukun parte karuk no rakut lezada nia hasan. Aleinde prova sira ne'e, tribunál mós tetu sirkunstánsia atenuante sira hanesan arguidu primeiravés mai hatan iha tribunál, diak malu ona ho lezada, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua fulan neen suspende ba tinan tolu.

21. Krime ofensa ba integridade física simples ho natureza violénsia doméstika

Nú. Prosesu	: 0007/19. VQLLT
Kompozisaun Tribunál	: Singulár
Juis	: Dr. José António de Jesus Escurial da Silva Faria
Prokuradór	: Dr. Ambrósio Rangel Freitas
Defeza	: Dr. Germano Guterres Ramos
Desizaun	: Pena prizaun fulan 3 suspende ba tinan 1

Iha 08 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AB hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 17 Jullu 2019, iha oras tuku 18:00 lokraik, arguidu foti tudik ho nia knuuk ne'ebé sikat hela iha arguidu nia kanotak no baku dala ida iha lezada nia ulun. Aktu ne'e rezulta lezada sofre kanek ki'ik iha ulun. Antes agresaun ne'e, arguidu hakbesik-an ba lezada ne'ebé fó han hela aifarina ba fahi no hateten ba lezada katak atu hola tan feto seluk, nune'e arguidu ho lezada diskute malu no mosu agresaun ne'e.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira iha akuzasaun loos hotu. Arguidu mós deklara katak foin primeiravés baku lezada, liu semana ida sira di'ak malu fali no to'o agora arguidu la baku ona lezada, arrepende ninia hahalok no promove ba futuro sei la baku ona lezada. Arguidu hatutan katak forma família hahú iha tinan 1985, iha oan na'in lima no arguidu mak sustentadór ba família.

Aleinde ne'e lezada mós konfirma faktu sira iha akuzasaun inklui konfirma ho arguidu nia deklarasaun katak arguidu foin primeiravés baku lezada, sira di'ak malu ona no to'o agora arguidu la baku ona lezada.

Alegasaun finál

Prokuradór husu ba tribunál atu aplika pena multa US\$30.00 ba arguidu tanba arguidu konfesa faktu hotu iha akuzasaun no konfirma mós husi lezada. Ida ne'e signifika katak arguidu provadu duni komete krime hasoru lezada.

Entretantu, defeza husu ba tribunál atu aplika pena admoestasaun ba arguidu bazeia ba sirkunstánsia atenuante sira hanesan arguidu foin primeiravés mai hatan iha tribunál, konfesa faktu sira, arguidu la repete ninia hahalok ne'e, arguidu nu'udar agrikultór no sai sustentadór prinsipál ba família.

Desizaun

Depoisde avalia faktu hotu, tribunál prova katak arguidu foti tudik ho nia knuuk no baku dala ida iha lezada nia ulun. Bazeia ba faktu prova sira no tetu mós sirkunstánsia atenuante sira hanesan arguidu primeiravés mai hatan iha, tribunál di'ak malu ho lezada, arrepende ona ninia hahalok, arguidu mak sustenta família, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

22. Krime ofensa ba integridade física simples ho natureza violénsia doméstika

Nú. Prosesu : 0002/19. VQSIC

Kompozisaun Tribunál : Singulár

Juis : Dr. José Gonçalves
Prokuradór : Dr. Julio da Silva Correia
Defeza : Dr. Germano Guterres Ramos
Desizaun : Pena prizaun tinan 1 suspende ba tinan 1 fulan 6

Iha 08 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdC hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 08 Janeiru 2019, iha oras tuku 04:00 madrugada, arguidu ho lezada diskute malu kona-ba lezada deskonfia arguidu amante ho feto seluk no bainhira sira diskute malu hela lezada halai sai tiha mai li'ur, nune'e arguidu duni tuir lezada no rasta lezada nia fuuk, tuku dala ida iha lezada nian kotuk laran, tebe dala rua iha lezada nia hirus-matan parte karuk no tebe dala ida iha lezada nia orgaun seksuál.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklara katak arrepende ninia hahalok. Arguidu mós deklara katak foin primeiravés hatan iha tribunál no to'o agora la komete krime ruma. Arguidu hatutan katak depoisde akontesimentu ne'e lezada halai ba hela tiha ho nia inan-aman to'o agora, maski arguidu hakarak nafatin lezada maibé ta'uk ho lezada nia família.

Aleinde ne'e, lezada kontinua konfirma faktu sira iha akuzasaun no deklara katak depoisde akontesimentu arguidu la ba tuir lezada iha lezada nia inan-aman to'o agora no arguidu foin primeiravés komete krime hasoru lezada.

Alegasaun finál

Prokuradór haktuir katak Tribunál Distritál Baukau kuaze lor-loron julga kazu ho natureza violénsia doméstika no kondena ona arguidu sira ne'e maibé krime ne'e sempre aumenta. Haree ba produsaun prova ba kazu ne'e, arguidu konfesa faktu hotu no lezada mós konfirma akuzasaun. Bazeia ba konsiderasaun hirak ne'e, husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak presiza konsidera arguidu nia konfisaun, foin primeiravés mai hatan iha tribunál, arrepende ona ninia hahalok, arguidu hakarak di'ak malu ho lezada maibé tauk ho lezada nian família sira. Tanba ne'e, husu ba tribunál aplika pena admoestasaun ba arguidu.

Desizaun

Depoisde avalia faktu hotu, tribunál prova katak arguidu rasta lezada nia fuuk, tuku dala ida iha lezada nian kotuk laran, tebe dala rua iha lezada nia hirus-matan parte karuk no tebe dala ida iha lezada nian orgaun seksuál. Bazeia ba faktu provadu sira ne'e no tetu mós sirkunstánsia atenuante sira hanesan arguidu primeiravés mai hatan tribunál, arrepende ona ninia hahalok no nu'udar ema ne'ebé mak iha responsabilidade hodi sustenta família, tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

23. Krime ofensa ba integridade fízika simples ho natureza violénsia doméstika

Nú. Prosesu : 0008/19. VQSIC

Kompozisaun Tribunál : Koletivu

Juis : Dra. Maria Modesta A. Viera, Dra. Jumiaty M. Freitas, Dr. Sribuana da Co

Prokuradór : Dr. Ambrósio Rangel Freitas

Defeza : Dr. António Fernandes

Desizaun : Pena prizaun tinan 1 suspende ba tinan 1

Iha 09 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura akordaun ba krime maus-tratus ba kónjuje ne'ebé envolve arguidu LM hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 18 Feveireiru 2019, iha oras tuku 11:00 dadeer, lezada ba fase roupa iha mota ne'ebé dook husi sira nia uma, distansia maizumenus metru 800 husi sira nia uma no arguidu mak hein sira nia oan ne'ebé sei ki'ik. Maibé la kleur sira nian oan ne'e tanis, nune'e arguidu haruka ema ba fó hatene lezada katak labarik tanis loos. Lezada mós fila ba uma no kabala deit ho toalla. Bainhira to'o uma, arguidu basa dala ida iha lezada nia kakorok, tebe dala ida iha lezada nia kotuk laran halo toalla monu. Hafoin, lezada halai ba viziñu nia uma no toba iha viziñu nia uma. Loron tuir mai, iha 19 Feveireiru 2019, iha tuku 09:00 dadeer, arguidu ba bolu lezada no to'o iha uma lezada halot nia roupa atu ba nian inan-aman nia uma, maibé arguidu la konkorda no silu lezada nia liman karuk ba kotuk rezulta liman moras.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu sira ne'ebé akontese 18 Feveireiru 2019 maibé faktu sira ne'ebé akontese iha 19 Feveireiru 2019, arguidu deklara katak la silu lezada nia liman, maibé kaer deit lezada nia liman. Arguidu hatutan katak depoisde akontesimentu ne'e, lezada halai tiha ba nia inan-aman sira nia uma no liu semana ida mak arguidu foin ba husu deskulpa no lori fila lezada ba sira nia uma. Arguidu mós deklara katak arrepende ninia hahalok ne'e no to'o agora arguidu la baku ona lezada.

Entretantu lezada kontinua konfirma faktu sira hotu iha akuzasaun no deklara katak depoisde akontesimentu ne'e lezada ba hela tiha ho nia inan-aman sira no liutiha semana ida mak arguidu husu deskulpa no lori lezada fila ba sira nia uma. Lezada hatutan katak arguidu foin primeiravés mai hatan iha tribunál no to'o agora la halo ona agresauñ hasoru lezada.

Alegasaun finál

Prokuradór haktuir katak maski arguidu konfesa parsial de'it maibé lezada kontinua konfirma faktu sira iha akuzasaun. Tanba ne'e konsidera katak faktu provadu no husu ba tribunál atu kondena arguidu ba pena prizaun tinan rua fulan neen suspende ba tinan tolu.

Enkuantu defeza haktuir katak arguidu ba husu deskulpa ba lezada inklui lezada nia inan-aman sira no lori lezada fila ba sira nia uma tanba arrepende ninia hahalok. Aleinde ne'e, to'o agora arguidu la repete ninia hahalok ne'e no foin primeiravés mai hatan iha tribunál.

Desizaun

Tribunál prova katak arguidu basa dala ida iha lezada nia kakorok no tebe dala ida iha lezada nia kotuk laran. Bazeia ba faktu provadu ne'e, tribunál halo alterasaun jurídku husi artigu 154 KP ba fali artigu 145 KP kona-ba ofensa ba integridade fizika simples tanba tribunál konsidera katak arguidu nia aktu sira preñse elementu husi krime ofensa ba integridade fízika simples.

Bazeia ba faktu provadu sira ne'e no tetu mós sirkunstáñsia atenuante sira hanesan arguidu husu ona diskulpa ba lezada no família, arrepende ninia hahalok no arguidu mak sustenta nia família, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

24. Krime ofensa ba integridade fízika simples ho natureza violénsia doméstika

Nú. Prosesu	: 0016/19. VQSIC
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Julio da Silva Correia
Defeza	: Dr. Germano Guterres Ramos
Desizaun	: Pena admoestasaun

Iha 09 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LS hasoru JP nu'udar nia banin mane, iha Munisípiu Vikeke.

Akuzasaun Prokuradór

Prokuradór akuza katak iha 02 Jullu 2019, iha oras tuku 22:00 kalan, arguidu ho lezadu hamutuk hemu tua mutin jerigen ida. Iha momentu sira hemu hela tua ne'e, lezadu tama ba kuartu laran atu foti osan iha kofre laran maibé osan refere la iha ona. Ho nune'e lezadu dun arguidu mak foti osan refere, tanba ne'e sira diskute malu no arguidu tebe dala ida iha lezadu nia knosen halo lezadu monu no ulun kona iha hadak rezulta kanek no ran.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(c), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak nia komete aktu ne'e tanba lezadu dun arguidu mak foti nia osan. Arguidu mós deklara katak depoisde akontesimentu ne'e arguidu husu ona deskulpa ba lezadu no sira di'ak malu ona. Arguidu hatutan katak arrepende ninia hahalok no promete iha futuro sei la halo tan kualkér krime hasoru lezadu no ema seluk no arguidu nu'udar agrikultór ne'ebé fulan ida hetan osan to'o US\$50.00.

Aleinde ne'e, lezadu kontinua konfirma faktu sira iha akuzasaun no deklara katak aleinde ba keixa iha polísia, lezada mós ba halo tratamentu iha Sentru Saúde Bibileo. Lezadu mós deklara katak di'ak malu ona ho arguidu no to'o agora arguidu la iha ona problema ho lezadu.

Alegasaun finál

Prokuradór haktuir katak arguidu provadu komete krime hasoru lezadu ne'ebe tuir loloos nia tenke respeita. Iha dalan seluk atu rezolve problema ne'e, la'os uza violénsia. Tenke fó kastigu ne'ebé prevene arguidu la komete tan nia hahalok ne'e. Nune'e, husu ba tribunál atu kondena kondena arguidu ho pena multa US\$90.00.

Entretantu defeza husu ba tribunál atu aplika pena admoestasaun ba arguidu ho konsiderasaun ba arguidu nia konfisaun, arependimentu no di'ak malu ona ho lezada.

Desizaun

Depoisde avalia faktu hotu, tribunál prova katak arguidu tebe dala ida iha lezadu nia knosen halo lezadu monu no ulun kona iha hadak. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok no di'ak malu ona ho arguidu, nune'e tribunál konklui prosesu ne'e no kondena arguidu ho pena admoestasaun.

25. Krime ofensa ba integridade fízika simples ho natureza violénsia doméstika

Nú. Prosesu	: 0022/19. VQOSU
Kompozisaun Tribunál	: Singulár
Juis	: Dra. Jumiaty Freitas
Prokuradór	: Dra. Remizia de Fatima da Silva
Defeza	: Dr. Sidonio Maria Sarmiento

Desizaun

: Pena multa US\$ 45.00

Iha 09 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MM hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 27 Outubru 2019, iha oras tuku 17:00 lokraik, arguidu foti lata serveza nian no tuda dala ida iha lezada nia liman kabun parte loos no basa dala tolu iha lezada nia hasan parte loos. Arguidu mós foti katana nia knuuk no baku dala ida iha lezada nia kotuk laran. Antes ne'e, arguidu ho lezada diskute malu kona-ba lezada haruka arguidu atu ba lori fila sira nia oan ne'ebé hela ho arguidu nia maun iha Vikeke vila.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira iha akuzasaun loos. Arguidu mós deklara katak husu ona deskulpa, di'ak malu ona ho lezada, arrepende ninia hahalok no promete sei la baku ona lezada. Arguidu hatutan katak arguidu nu'udar agrikultór no rezultadu husi nia serbisu ne'e hodi sustenta de'it ba família.

Bazeia ba prokuradór nia pedidu, tribunál presinde lezada nia deklarasaun tanba arguidu konfesa faktu sira hotu iha akuzasaun.

Alegasaun finál

Prokuradór husu ba tribunál atu fó kastigu ne'ebé bele prevene arguidu ninia hahalok iha futuru tanba konsidera katak Tribunál Distritál Baukau kuaze lor-loron halo julgamentu ba krime ho natureza violénsia doméstika no kondena ona arguidu barak maibé krime ne'e sempre aumenta ba bei-beik.

Entretantu defeza husu ba tribunál atu tau konsiderasaun ba arguidu nia konfisaun, arguidu nia arependimentu no di'ak malu ona ho lezada. Tanba ne'e, husu ba tribunál aplika pena ne'ebé kmaan liu ba arguidu.

Desizaun

Depoisde avalia faktu hotu, tribunál prova katak arguidu foti lata serveza no tuda dala ida iha lezada nia liman kabun parte loos. Tribunál mós prova katak arguidu basa dala tolu iha lezada nia hasan parte loos no uza katana nia knuuk no baku dala ida iha lezada nia kotuk laran. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok no di'ak malu ona ho lezada, nune'e tribunál konklui prosesu ne'e no

kondena arguidu ho pena multa US\$45.00 ne'ebé arguidu sei selu US\$1.00 kada loron durante loron 45. Bainhira arguidu la selu pena multa ne'e, arguidu sei kumpri iha prizaun durante loron 30 nu'udar pena alternativa.

26. Krime ofensa ba integridade física simples ho natureza violéncia doméstika

Nú. Prosesu : 0026/18. VQWTL
Kompozisaun Tribunál : Singulár
Juis : Dra. Maria Modesta de Almeida Viera
Prokuradór : Dr. Ambrosio Rangel Freitas
Defeza : Dr. António Fernandes
Desizaun : Pena prizaun fulan 6 suspende ba tinan 1

Iha 09 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu FdS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 04 Novembru 2019, iha oras tuku 14:30 lokraik, arguidu no lezada diskute malu kona-ba osan US\$20.00 ne'ebé arguidu uza ba sosa tua no hemu ho nia kolega sira no mós sosa tiha kartaun telefone hodi telefone ba feto seluk. Iha diskute malu ne'e, arguidu tuku dala rua iha lezada nia kotuk laran, basa dala rua iha iha lezada nia hasan parte loos, foti kadeira atu baku lezada maibé la konsege tanba lezada halai tiha. Arguidu duni tuir lezada no toman lezada no rasta lezada fuuk halo lezada monu tun ba rai. Momentu lezada iha rai ne'e, arguidu tebe dala ida iha lezada nia kotuk laran, tebe dala ida iha lezada nia ulun no tebe dala ida iha lezada nia kabun.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente katak momentu lezada monu arguidu tebe deit dala ida iha lezada nia kotuk laran. Entretantu faktu seluk ne'ebé akontese antes, arguidu konfesa. Arguidu mós deklara katak depoisde akontesimentu ne'e lezada ba hela tiha ho nia inan-aman no liu semana ida mak arguidu ba husu deskulpa ba lezada. Arguidu arrepende ninia hahalok no promete iha futuru sei la baku tan lezada, arguidu nu'udar agrikultór no rezultadu hodi sustenta de'it família.

Entretantu, lezada kontinua konfirma faktu sira iha akuzasaun no konfirma mós ho arguidu nia deklarasaun katak durante semana ida lezada hela ho nia inan-aman, hafoin arguidu ba tuir lezada mak sira di'ak malu fali. Lezada mós deklara katak to'o agora arguidu la baku ona lezada.

Alegasaun finál

Prokuradór konsidera arguidu provadu komete krime hasoru lezada, mezmu arguidu konfesa parsialmente ba faktu iha akuzasaun, maibé lezada konfirma. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida.

Entertantu defeza haktuir katak arguidu konfesa, arrepende ona ninia hahalok no di'ak malu ona ho lezada. Tanba ne'e, husu ba tribunál aplika pena ne'ebé justu no adekuadu ba arguidu.

Desizaun

Depoisde avalia faktu hotu, tribunál prova katak arguidu tuku dala rua iha lezada nia kotuk laran, basa dala rua iha iha lezada nia hasan parte loos, foti kadeira atu baku lezada, maibé la konsege tanba lezada halai tiha. Tribunál mós prova katak arguidu rasta lezada nia fuuk halo lezada monu ba rai, arguidu tebe dala ida iha lezada nia kotuk laran, tebe dala ida iha lezada nia ulun no tebe dala ida iha lezada nia kabun. Bazeia ba faktu provadu sira ne'e no tetu mós ho sirkunstánsia atenuante sira hanesan arguidu di'ak malu ona ho lezada no arrepende ona ninia hahalok, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

27. Krime maus-tratus ba kónjuje

Nú. Prosesu : 0002/17. VQLLT

Kompozisaun Tribunál : Koletivu

Juis : Dr. José Gonçalves, Dr. José A.J.E.da Silva Faria, Dr. Sribuana da Costa

Prokuradór : Dr. Julio da Silva Correia

Defeza : Dr. Sidonio Maria Sarmiento

Desizaun : Pena prizaun tinan 2 suspende ba tinan 3

Iha 09 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura akordaun ba krime maus-tratus ba kónjuje ne'ebé envolve arguidu SP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 14 Fevereiru 2017, iha oras tuku 21:15 kalan, lezada ho arguidu ba partisipa serimonia graduasaun ida maibé tanba sira nia oan sei ki'ik depoisde han hotu sira fila ona mai uma. Bainhira to'o iha uma, arguidu deskonfia lezada iha relasaun domin ho mane seluk nune'e arguidu ho lezada diskute malu no sira halo juramentu atu la bele deskonfia malu tan. Juramentu ne'e, arguidu tau bee iha kopu ida no fó ba lezada hemu maibé depoisde lezada hemu hotu bee ne'e, arguidu ho lezada continua diskute malu no arguidu tuku dala ida iha lezada nia hirus-matan, basa ho repetidu iha lezada nia hasan parte karuk no loos, arguidu foti mós diman

atu sona lezada maibé la konsege tanba lezada tebe arguidu no foti tiha diman husi arguidu. Hafoin ne'e, arguidu foti kopu no tuda dala ida iha lezada nia ulun rezulta kanek no ran.

Tuir mai, iha 28 Novembru 2015, arguidu uza katana taa dala ida iha lezada nia kabun no kakorok rezulta kanek.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 prizaun, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu sira ne'ebé akontese iha 14 Novembru 2017, enkuantu faktu sira ne'ebé akontese iha 28 Novembru 2015, arguidu deklara katak la'os taa lezada maibé baku uza katana nia belar iha lezada nia kabun dala ida no kakorok dala ida. Arguidu mós deklara katak depoisde akontesimentu ne'e lezada ba hela tiha ho lezada nia inan-aman hafoin arguidu ba husu deskulpa no lori fila lezada. Arguidu mós arrepende ninia hahalok no promete iha futuru sei la baku tan ona lezada, arguidu nu'udar agrikultór ho rezultadu sustenta de'it família. Arguidu hatutan katak antes ne'e arguidu kaer hela katana tanba foin fila husi ke'e fatuk atu halo sira nia uma no arguidu sei ho kondisaun kolen no hamlaha, derrepente lezada koa'lia ba arguidu katak lezada deskonfia arguidu ba feto seluk, nune'e arguidu halo agresaun ne'e.

Aleinde ne'e, lezada kontinua konfirma faktu sira ne'ebé akontese iha 14 Novembru 2017 no ba faktu ne'ebé akontese iha 28 Novembru 2017, lezada konfirma ho arguidu ninia deklarasaun katak arguidu uza katana nia belar mak baku iha lezada nia kabun no kakorok no rezulta kanek ki'ik iha lezada nia kabun. Depoisde akontesimentu ne'e, lezada ba hela tiha ho lezada nia inan-aman durante fulan ida hafoin arguidu ba husu deskulpa no lori lezada fila ba sira nian uma no to'o agora arguidu la halo ona agresaun hasoru lezada.

Alegasaun finál

Prokuradór haktuir katak iha produsaun ba prova sira, arguidu nega faktu balun iha akuzasaun katak iha akontesimentu segundu 28 Novembru 2017, arguidu la'os taa lezada maibé baku lezada uza katana nia belar iha lezada nia kabun dala ida no kakorok dala ida no lezada mós reforsa arguidu nia deklarasaun ne'e. Mezmu nune'e prokuradór konsidera arguidu provadu komete krime hasoru lezada ne'ebé tuir loloos arguidu mak proteje maibé pela kontrariu arguidu mak komete fali krime hasoru lezada. Nune'e, atu prevene arguidu repete ninia hahalok ne'ebé hatoman-an uza violénsia hodi rezolve problema iha futuru, husu ba tribunál atu kondena arguidu ho pena prizaun tinan haat iha prizaun.

Enkuantu defeza haktuir katak arguidu deklara deit faktu ne'ebé nia komete no konfirma mós husi lezada. Aleinde ne'e, arguidu iha hanoin di'ak tanba ba tuir lezada hodi husu deskulpa. Aleinde

ne'e, arguidu arrepende ona ninia hahalok no di'ak malu ona ho lezada. Tanba ne'e, husu ba tribunál aplika pena mínimu husi krime refere.

Desizaun

Depoisde avalia faktu hotu, tribunál prova katak iha 14 Novembru 2017, arguidu tuku dala ida iha lezada nia hirus-matan, basa ho repetidu iha lezada nia hasan parte karuk no loos, foti kopu no tuda lezada iha ulun. Tribunál mós prova katak iha 28 Novembru 2017, arguidu uza katana nia belar no baku dala rua iha lezada nia kabun no kakorok. Bazeia ba faktu provadu sira ne'e no tetu mós sirkunstánsia atenuante sira hanesan arguidu arrepende ona ninia hahalok no husu ona deskulpa ba lezada, nune'e tribunál konklui prosesu ne'e kondena arguidu ho pena prizaun tinan rua suspende ba tinan tolu.

28. Krime ofensa ba integridade fízika simples ho natureza violénsia doméstika

Nú. Prosesu : 0025/19. VQSIC
Kompozisaun Tribunál : Singulár
Juis : Dr. Sribunana da Costa
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena prizaun fulan 6 suspende ba tinan 1

Iha 09 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 09 Setembru 2019, iha oras tuku 14:00 meiodia, arguidu silu lezada nia liman ba kotuk no arguidu husik tiha momentu viziñu sira haree arguidu nia hahalok ne'e. Maibé depoisde ne'e, arguidu kaer lezada nia kabaas no riba lezada ba rai, halo lezada nia ulun kona iha fatuk no rezulta nakles. Antes agresaun ne'e, arguidu ho lezada diskute malu kona-ba lezada la ajuda arguidu lalin au nune'e mosu agresaun hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu mós promete sei la repete ninia hahalok ne'e iha futuru. Arguidu mós deklara katak depoisde akontesimentu ne'e sira di'ak malu perante família sira no arguidu nu'udar agrikultór ho rezultadu sustenta de'it ba família.

Aleinde ne'e, lezada mós kontinua konfirma faktu hotu iha akuzasaun, di'ak malu ona ho arguidu no to'o agora arguidu la baku ona lezada.

Alegasaun final

Prokuradór haktuir katak arguidu konfesa faktu sira hotu no lezada mós kontinua konfirma faktu sira refere, tanba ne'e atu prevene krime ne'e la akontese tan iha futuru, husu ba tribunál kondena arguidu ho pena prizaun maibé suspende nia ezekusaun.

Enkuantu, defeza haktuir katak tau konsiderasaun ba arguidu nia konfisaun iha produsaun ba prova, arguidu nia arrendimentu, di'ak malu ona ho lezada no koopera justisa. Tanba ne'e, husu ba tribunál fó pena ne'ebé bele hadi'a arguidu nia hahalok iha futuru.

Desizaun

Depoisde avalia faktu hotu, tribunál prova katak arguidu silu lezada nia liman ba kotuk, kaer lezada nia kabaas no riba lezada ba rai halo ulun kona iha fatuk. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, di'ak malu ona ho lezada, nune'e tribunál konklui prosesu ne'e kondena arguidu ho pena prizaun fulan neen suspende ba tinan ida.

29. Krime maus-tratus ba kónjuje

Nú. Prosesu : 0017/19. VQVQQ
Kompozisaun Tribunál : Koletivu
Juis : Dr. José Quintão Soares Celestino, Dra. Jumiaty Freitas, no Dra. Maria Modesta de Almeida Viera
Prokuradór : Dra. Remizia de Fátima da Silva
Defeza : Dr. António Fernandes
Desizaun : Pena prizaun tinan 2 suspende ba tinan 2

Iha 10 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura akordaun ba krime maus-tratus ba kónjuje ne'ebé envolve arguidu VSP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak 03 Jullu 2019, iha oras tuku 10:00 dadeer, arguidu simu telefone husi nia feen primeiru hodi haruka duni sai lezada ne'ebé hanesan arguidu nia feen segundu husi uma. Nune'e arguidu tama ba lezada nia kuartu laran no tuku dala ida iha lezada nia ulun parte klaran no tebe dala ida iha lezada nia kidan.

Tuir mai, iha 05 Jullu 2019, iha oras tuku 22:00 kalan, tanba lezada nafatin iha uma nune'e arguidu soe sai tiha lezada ho nia oan nia roupa ba liur no kalan ne'e lezada ba toba iha viziñu nia uma. Iha 07 Jullu 2019, iha oras tuku 16:00 lokraik, arguidu ho lezada kontinua diskute malu,

tanba lezada informa ona arguidu ninia hahalok ne'e ba iha Rede Feto parte Vikeke. Bainhira sira diskute malu ne'e, lezada halai tan ba viziñu nia uma no arguidu kaer surik ne'ebé iha hela nia knuuk laran halai tuir lezada no baku dala lima iha lezada nia kotuk laran. Lezada konsege hadau tiha surik husi arguidu nia liman maibé surik nia kroat kona iha lezada nia liman fuan parte karuk no rezulta kanek.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira iha akuzasaun loos. Arguidu mós deklara katak depoisde akontesimentu ne'e di'ak malu fali ona ho lezada. Arguidu hatutan katak arrepende ninia hahalok no promete sei la komete tan aktu hanesan hasoru lezada. Arguidu mós dehan foin primeiravés baku lezada no arguidu nu'udar peskadór ne'ebé fulan ida bele hetan osan US\$200.00.

Aleinde ne'e, lezada mós kontinua konfirma faktu sira iha akuzasaun no deklara katak depoisde akontesimentu ne'e sira di'ak malu fali perante autoridade lokál no família rua no to'o agora arguidu la baku ona lezada.

Alegasaun finál

Prokuradór haktuir katak arguidu konfesa ninia hahalok no konfirma mós husi lezada, nune'e konsidera arguidu provadu komete krime hasoru lezada. Tanba ne'e, husu ba tribunál atu kondena arguidu ho pena prizaun tinan rua suspende ba tinan tolu.

Entretantu defeza haktuir katak tau konsiderasaun mós ba arguidu nia deklarasaun iha produsaun prova no depoisde akontese sira di'ak malu perante autoridade lokál, foin primeiravés mai hatan iha tribunál no arrepende ona ninia hahalok. Tanba ne'e, husu ba tribunál aplika pena ne'ebé justu ba arguidu hodi garantia sira nia moris iha futuru.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ulun parte klaran no tebe dala ida iha lezada nia kidan. Tribunál mós prova katak arguidu soe sai tiha lezada ho nia oan nia rupa no kalan ne'e lezada ba toba iha viziñu nia uma. Iha dadeer, arguidu kaer surik ne'ebé iha nia knuuk laran no baku dala lima iha lezada nia kotuk laran no bainhira lezada hadau tiha surik husi arguidu maka surik nia kroat kona iha lezada nia liman fuan ida parte karuk.

Bazeia ba faktu prova sira ne'e no tetu mós ho sirkunstánsia atenuante sira hanesan arguidu arrepende ona ninia hahalok, primeiravés baku lezada no nu'udar ema ne'ebé mak iha

responsabilidade hodi sustenta família, nune'e tribunál konklui prosesu ne'e kondena arguidu ho pena prizaun tinan rua suspende ba tinan rua.

30. Krime ofensa ba integridade fízika simples ho natureza violénsia doméstika

Nú. Prosesu : 0057/19. BCSIC
Kompozisaun Tribunál : Singulár
Juis : Dra. Jumiaty Freitas
Prokuradór : Dr. Bartolomeu de Araújo
Defeza : Dr. Antonio Fernandes
Desizaun : Pena multa US\$60.00

Iha 14 Jullu 2020, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DdC hasoru nia feen, iha Distritu Baukau.

Akuzasaun Prokuradór

Prokuradór akuza katak iha 30 Agostu 2019, iha oras tuku 04:00 madrugada, arguidu foti aisar no baku dala ida iha lezada nia ulun. Nune'e lezada ta'uk atu halai maibé arguidu tebe dala ida iha lezada nia isin lolon. Antes agresaun ne'e, arguidu ho lezada diskute malu kona-ba mensagen ne'ebé tama iha arguidu nia telefone no dehan katak "*ó mai lalais se lae orsida portaun taka ona,*" nune'e arguidu komete agresaun hirak ne'e hasoru lezada.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarara katak depoisde akontesimentu ne'e sira di'ak malu fali, foin primeiravés mai hatan iha tribunál no promete sei la komete tan krime hanesan hasoru lezada ka membru família sira iha futuru no arguidu nu'udar seguransa sivíl ho rendimentu kada fulan US\$150.00.

Bazeia ba pedidu husi prokuradór, tribunál presinde lezada nia deklarasaun tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba arguidu nia konfisaun no konfirma mós husi lezada. Liutan prokuradór argumenta katak kada lora tribunál sempre julga kazu violénsia doméstika, nune'e husu ba tribunál fó pena ne'ebé bele prevene arguidu ninia hahalok iha futuru no eduka mós comunidade ne'ebé besik arguidu katak krime violénsia doméstika ne'e mós hetan kastigu. Tanba ne'e, husu ba tribunál aplika pena prizaun fulan rua suspende ba tinan ida.

Entretantu defeza husu ba tribunál atu aplika pena ne'ebé justu ba arguidu tanba arguidu konfesa faktu sira, foin primeiravés mai hatan iha tribunál, di'ak malu ona ho lezada no to'o agora la baku ona lezada.

Desizaun

Depoisde avalia faktu hotu, tribunál prova katak arguidu foti aisar no baku dala ida iha lezada nia ulun. Tribunál mós prova katak arguidu tebe dala ida iha lezada nia isin lolon. Bazeia ba faktu prova sira ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada lora durante lora 60. Tribunál mós fiksa pena alternativa durante lora 40 prizaun, bainhira arguidu la selu pena multa refere.

31. Krime ofensa ba integridade fízika simples ho natureza violéncia doméstika

Nú. Prosesu : 0089/17. BCBCV
Kompozisaun Tribunál : Singulár
Juis : Dra. Sribuana da Costa
Prokuradór : Dr. Ambrosio Rangel Freitas
Defeza : Dr. Horta Ramos (advogadu privadu)
Desizaun : Pena prizaun fulan 3 suspende ba tinan 1

Iha 14 Jullu 2020, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violéncia doméstika ne'ebé envolve arguidu DNX hasoru nia feen, iha Distritu Baukau.

Akuzasaun Prokuradór

Prokuradór akuza katak iha 05 Dezembru 2017, iha oras tuku 13:00 meiodia, arguidu dehan ba lezada atu hamutuk ho arguidu no arguidu nia feen segundu ba vizita arguidu nia família. Rona ne'e, lezada foti tudik atu sona arguidu, nune'e arguidu tuku dala barak iha lezada nia ulun, rasta lezada nia faru to'o nakles, kaer lezada nia fuuk no riba didin-lolon.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no promete sei la halo tan krime hasoru lezada ka membru família sira iha futuru. Arguidu mós deklara katak depoisde akontesimentu ne'e, iha tempu lokraik arguidu husu deskulpa ba lezada no sira di'ak malu fali. Arguidu mós deklara katak la baku ona lezada, foin primeiravés mai hatan iha tribunál no nu'udar peskadór kada lora hetan osan US\$5.00.

Aleinde ne'e, lezada kontinua konfirma faktu sira iha akuzasaun no reforsa arguidu nia deklarasaun katak sira di'ak malu ona no to'o agora arguidu la baku ona lezada.

Alegasaun final

Prokurador konsidera arguidu provadu komete krime hasoru lezada bazeia ba arguidu nia deklarasaun no lezada nia konfirmasaun. Arguidu mos iha kapasidade finanseiru, nune'e husu ba tribunál aplika pena multa ba arguidu.

Enkuantu defeza husu ba tribunál atu aplika pena ne'ebé adekua ba arguidu tanba arguidu konfesa faktu hotu iha akuzasaun, arrepende ona ninia hahalok, foin primeiravés mai hatan iha tribunál no koopera di'ak ho justisa.

Desizaun

Depoide avalia faktu hotu, tribunál prova katak arguidu tuku dala barak iha lezada nia ulun, rasta lezada nia faru to'o nakles no kaer lezada nia fuuk no riba ba didin-lolon. Bazeia ba faktu provadu sira ne'e no tetu mos sirkunstansia atenuante sira hanesan, arrepende ona ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

32. Krime maus-tratus ba kónjuje

Nú. Prosesu : 0006/19. VQLLT
Kompozisaun Tribunál : Singulár
Juis : Dra. Maria Modesta d. A. Viera, Dr. José Gonçalves no Dra. Sribuana da Costa
Prokurador : Dra. Remizia de Fátima da Silva
Defeza : Dr. Sidonio Maria Sarmiento
Desizaun : Pena prizaun tinan 2 suspende ba tinan 2

Iha 15 Jullu 2020, Tribunál Distritál Baukau liuhusi julgamentu movel iha Munisípiu Vikeke, prezide julgamentu leitura akordaun ba krime maus-tratus ba kónjuje ne'ebé envolve arguidu FdS hasoru nia feen, iha Munisípiu Vikeke.

Akuzasaun Prokurador

Prokurador akuza katak iha 04 Juñu 2019, iha oras tuku 06:00 dadeer, lezada ba bolu sira nia oan ho idade tinan tolu ne'ebé mak ba haris hela iha bee-matan, nune'e arguidu tuku dala ida iha lezada nia kotuk laran, basa dala ida iha lezada nia ulun parte kotuk. Bainhira lezada halai, arguidu foti alu no tuda kona iha lezada nia ain kabun. Iha loron tuir mai, oras tuku 07:00 dader, lezada prepara hela hahan atu sira han no arguidu mai no tuku dala ida iha lezada nia kotuk laran no rasta lezada no arguidu nia liman kukun kona iha lezada nia hirus-matan no rezulta kanek.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2(a), 3(b), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu sira ne'e hotu no deklarata katak arrepende ninia hahalok. Arguidu mós deklarata katak arguidu komete agresaun iha 04 Juñu ne'e tanba lezada rasta sira nia oan hamutuk ho labarik nia avo ne'ebé lori sira nia oan ba hariis hamutuk. Enkuantu akontesimentu iha oras tuku 07:00 dadeer, arguidu komete aktu sira ne'e tanba lezada lakohi ba natar ho arguidu. Arguidu hatutan katak foin primeiravés mai hatan iha tribunál no maski sira moris separa ona maibé arguidu promete sei la komete tan kualkér krime iha futuru.

Aleinde ne'e, lezada mós konfirma faktu sira iha akuzasaun no deklarata katak lezada ba bolu sira nia oan atu la bele haris tanba labarik moras hela la'os rasta hamutuk ho nia avo. Lezada mós hatutan katak arguidu hakarak la'o livre no bainhira lezada ko'alia kona-ba arguidu nia hahalok sira ne'e, arguidu komesa hirus no diskute malu ho lezada. Depoide akontesimentu ne'e sira moris separadu no durante ne'e lezada ho oan na'in rua moris hamutuk ho lezada nia bin.

Alegasaun finál

Prokuradór haktuir katak arguidu konfesa faktu hotu no konfirma mós husi lezada. Aleinde ne'e, agora dadaun sira separa ona no lezada ho oan sira hases-an husi arguidu ba moris ho nia bin. Ida ne'e signifika katak durante moris hamutuk arguidu sempre halo tratamentu at hasoru lezada. Tanba ne'e, husu ba tribunál atu fó kastigu ne'ebé bele prevene arguidu ninia hahalok iha futuru.

Aleinde ne'e defeza husu ba tribunál atu konsidera arguidu nia konfisaun iha produsaun ba prova, arrependimentu, di'ak malu ona no foin primeiravés mai hatan iha tribunál. Tanba ne'e, husu ba tribunál atu aplika pena ne'ebé adekuaudu ba arguidu.

Desizaun

Depoide avalia faktu sira ne'ebé prodús durante julgamentu, tribunál prova katak arguidu tuku dala ida iha lezada nia kotuk laran, basa dala ida iha lezada nia ulun parte kotuk no bainhira lezada halai, arguidu foti alu no tuda kona iha lezada nia ain kabun. Tribunál mós prova katak iha loron tuir mai, arguidu tuku dala ida iha lezada nia kotuk laran, rasta lezada halo arguidu nia liman kukun kona iha lezada nia hirus-matan.

Bazeia ba faktu prova sira ne'e no tetu mós sirkunstánsia sira hanesan arguidu arrepende ona ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

33. Krime tentativa omisídiu simples ho natureza violénsia doméstika no arma brankas

Nú. Prosesu : 0060/19. BCSIC

Kompozisaun Tribunál : Koletivu

Juis : Dra. Maria Modesta, Dr. Jose Goncalves no Dra. Sribuana da Costa
Prokuradór : Dra. Remizia de Fatima da Silva
Defeza : Dr. Antonio Fernandes
Desizaun : Pena prizaun tinan 8

Iha 16 Jullu 2020, Tribunál Distritál Baukau prezide julgamentu leitura akordaun ba krime tentativa omisídiu simples ho natureza violénsia doméstika ne'ebé envolve arguidu CF hasoru nia feen, iha Distritu Baukau.

Akuzasaun Prokuradór

Prokuradór akuza katak iha 06 Outubru 2019, iha oras tuku 16:45 lokraik, lezada haree nia telefone ne'ebé foin sosa at tiha. Lezada ho tanis husu ba arguidu no sira diskute malu no ikus arguidu foti katana ne'ebé foin kadi no sikat hela didin lolon uma nian no taa dala ida iha lezada nia kabaas parte loos to'o nakles. Lezada fila oin ba arguidu atu tuku arguidu, maibé la konsege tanba arguidu taa tan dala ida iha lezada nia liman sikun parte loos to'o nakles. Iha momentu ne'e, lezada tenta buka dalan atu halai sai maibé arguidu taka netik tiha odamatan, nune'e lezada tenta halai sai fali husi odamatan sorin maibé arguidu taa tan dala ida iha lezada nia ulun halo lezada monu tun ba rai.

Momentu lezada iha rai ne'e, arguidu kontinua taa dala hitu iha lezada nia kotuk laran. Hafoin ne'e, arguidu halai no lezada hakilar tuir ba arguidu hodi dehan "*ó taa hau mate ona no halai buka moris*". Lezada koko hader hodi sai ba liur maibé oin nakukun nune'e lezada monu hela iha dapur kotuk. Lezada konsege ba halo tratamentu iha Ospital Referál Baukau durante loron lima.

Prokuradór akuza arguidu kontra artigu 138 KP kona-ba omisídiu simples ho moldura penál tinan 8 to'o tinan 20 prizaun. Kontra artigu 32 kona-ba tentaiva no konjuga ho artigu 2, 3(a), 35(b) no 36 LKVD no artigu 20 (1) no (2) alinea f husi Lei Arma Brankas.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós deklarata katak nia mai hatan ona dala rua iha tribunál kona krime ofensa ba integridade fízika simples hasoru lezada. Arguidu mós promete sei la komete tan krime hanesan iha futuru. Arguidu hatutan katak nu'udar agrikultór ho rezultadu sustenta de'it ba família.

Entretantu lezada kontinua konfirma faktu sira iha akuzasaun no deklarata katak depoisde arguidu komete aktu sira ne'e, arguidu halai tiha nune'e lezada tenta sai mai liur no monu hela iha dapur kotuk no foin bolu lezada nia tian atu ba fó hatene família sira.

Testemuña MF nu'udar lezada nia tian depoimenta katak lezada iha ona liur mak bolu testemuña no dehan katak ba fó hatene lai família sira tanba arguidu taa mate ona lezada, maibé testemuña

hamrik iha nia uma mak hateke ba lezada no haree ran barak mak suli iha lezada nia isin no testemuña la hatene kanek iha parte saida.

Alegasaun finál

Prokuradór konsidera arguidu provadu komete krime hasoru lezada bazeia ba arguidu nia konfisaun no lezada nia konfirmasaun ba faktu sira. Aleinde ne'e, arguidu mós iha antesidente kriminál hasoru lezada (krime ofensa ba integridade física simples). Ho nune'e, husu ba tribunál aplika pena únika prizaun tinan ualu ba arguidu.

Enkuantu defeza haktuir katak iha julgamentu arguidu konfesa faktu sira sein rezerva no lezada mós konfirma faktu sira iha akuzasaun. Bazeia ba produsaun prova sira ne'e parte defeza entrega ba tribunál atu deside pena ba arguidu.

Desizaun

Depoisde avalia faktu sira, tribunál prova katak arguidu foti katana ne'ebé foin kadi no sikat hela iha didin lolon uma nian no taa dala ida lezada nia kabaas parte loos to'o nakles, taa dala ida iha lezada nia liman sikun parte loos to'o nakles. Tribunál mós prova katak arguidu taka netik tiha odamatan no taa tan dala ida iha lezada nia ulun halo lezada monu tun ba rai. Bainhira iha rai arguidu kontinua taa dala hitu iha lezada nia kotuk laran. Lezada tenta sai ba liur, maibé tanba oin nakukun lezada monu hela iha dapur kotuk. Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ona ninia hahalok, nune'e tribunál kondena arguidu ho pena prizaun tinan ualu prizaun.

34. Krime omisídiu agravadu

Nú. Prosesu : 0020/18. VQOSU
Kompozisaun Tribunál : Koletivu
Juis : Dr. José António E. S. Faria, Dra. Sribuana d. Costa no Dra. Maria M. Viera
Prokuradór : Dr. Julio da Silva Correia
Defeza : Dr. Antonio Fernandes
Desizaun : Pena prizaun tinan 6

Iha 16 Jullu 2020, Tribunál Distritál Baukau prezide julgamentu leitura akordaun ba krime omisídiu agravadu ne'ebé envolve arguidu Manuel da Costa Guterres hasoru Raimundo da Costa Guterres nu'udar nia alin, iha Munisípiu Vikeke.

Akuzasaun Prokuradór

Prokuradór akuza katak iha 15 Outubru 2018, iha oras tuku 18:00 lokraik, lezadu ba iha nia alin mane (Bernardo da Costa Guterres) hodi husu kona-ba se mak sunu nia uma to'os. Maibé Bernardo hatan ba lezadu katak la hatene se mak sunu. Depoisde ne'e, testemuña Bernardo ho lezadu no lori mós ho katana ba buka arguidu iha arguidu nia uma to'os. Maibé bainhira to'o

arguidu nia uma to'os, sira haree arguidu nia uma to'os mós hetan sunu. Maski nune'e, lezadu dun nafatin arguidu mak sunu nia uma to'os no sira komesa diskute malu. Iha diskute malu ne'e, lezadu duni arguidu to'o maizumenus metru 20 no arguidu foti fatuk no tuda iha lezadu nia ulun no rezulta kanek no halo lezadu lakon konsiensia durante oras rua iha fatin akontesimentu hafoin transporta ba Sentru Saude Ossu no kontinua ba tratamentu iha Ospital Referral Baukau. Maibe iha 16 Outubru 2019 iha oras tuku 04:00 madrugada lezadu hakotu iis (mate).

Prokurador akuza arguidu kontra artigu 139 (g) KP kona-ba omisidui agravadu ho moldura penal tinan 12 to'o tinan 25 prizaun.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak bainhira lezadu duni no to'o iha lutu ne'ebé as, nune'e arguidu derrepente lamas kona fatuk no tuda ba kotuk kona lezadu, maibe la hatene fatuk kona iha parte ne'ebé. Arguidu kontinua halai to'o uma hafoin rona lezadu mate ona. Arguidu ho lezadu nia feen ho oan sira dame malu ona no arguidu ajuda fó ona osan US\$2,000.00 ba lezadu nia feen ho oan sira no arguidu mak sustenta lezadu nia feen ho oan sira inklui halo uma ba sira.

Testemuña Bernardo da Costa Guterres nu'udar arguidu no lezadu nia alin mane depoimenta katak testemuña nia uma to'os besik malu ho arguidu no lezadu nia uma to'os nune'e bainhira testemuña fila husi haree karau no haree ho matan uma to'os ahi han hotu ona no testemuña la hatene se mak sunu. Testemuña mós deklarata katak arguidu ho lezadu nia feen ho oan sira dame malu ona, arguidu fó osan US\$2,000.00 ba lezadu nia feen no oan sira inklui halo uma ba sira.

Alegasaun finál

Prokurador haktuir katak arguidu provadu komete krime hasoru lezadu to'o lezadu tenke lakon nia vida. Arguidu mós tau matan ba lezadu nia feen no oan sira no halo uma ba sira. Ho nune'e husu ba tribunál atu kondena arguidu ba pena minimu husi krime refere.

Entretantu defeza haktuir katak mezmua arguidu konfesa faktu hotu iha akuzasaun maibe arguidu laiha intensaun atu halo mate lezadu no iha akontesimentu ne'e la iha ema seluk. Aleinde ne'e, lezadu lori katana duni arguidu no besik loos ona arguidu, nune'e arguidu derrepente lamas kona fatuk no tuda ba kotuk mak kona lezadu no kona iha parte ne'ebé arguidu rasik mós la hatene. Arguidu nian asaun ne'e prenze rekeztu husi artigu 44 KP kona ba lejítima defeza no artigu 49 KP kona-ba estadu ho nesesidade deskulpante no la prenze krime omisidui agravadu. Tanba ne'e, husu ba tribunál absolve arguidu husi prosesu ne'e.

Desizaun

Depoizde avalia faktu hotu, tribunál prova katak iha lutu-hun arguidu foti fatuk no tuda lezadu iha parte ulun rezulta kanek no halo lezadu lakon konsiensia durante oras rua. Maski lori ona ba iha

sentru saúde no ospital maibé iha 16 Outubru 2019, iha oras tuku 04:00 madrugada lezadu hakotu iis. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arguidu ho lezadu nia feen ho oan sira dame malu ona, arguidu fó ona osan US\$2,000.00 ba lezadu nia feen no oan sira inklui halo uma ba sira, nune'e tribunál konklui prosesu ne'e no kondena arguidu ho pena prizaun tinan neen.

35. Krime ofensa ba integridade física simples ho natureza violénsia doméstika

Nú. Prosesu : 0002/20. VQSIC
Kompozisaun Tribunál : Singulár
Juis : Dr. José António de Jesus Escurial da Silva Faria
Prokuradór : Dr. Ambrósio Rangel Freitas
Defeza : Dr. Sidonio Maria Sarmiento
Desizaun : Pena prizaun fulan 3 suspende ba tinan 1

Iha 16 Jullu 2020, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AdA hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 19 Janeiru 2020, iha oras tuku 14:30 lokraik, arguidu tuku dala ida iha lezada nia reen-toos, basa dala ida iha lezada nia kanuruk no foti kadeira baku dala ida iha lezada nia kanuruk. Aleinde ne'e, arguidu foti kanuru suru rai atu baku lezada, maibé la konsege tanba lezada hases-an tiha. Antes agresaun ne'e, arguidu ho lezada diskute malu kona-ba arguidu dehan ba Watulari maibé lezada rona fali arguidu iha Baukau, nune'e arguidu halo agresaun hirak ne'e hasoru lezada.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun prokuradór nian. Arguidu mós deklara katak arrepende ninia hahalok no promete sei la repete ninia hahalok ne'e iha futuru. Arguidu hatutan katak antes nia halo agresaun ne'e, lezada ba hasoru arguidu iha dalan besik uma no tuda arguidu iha dalan maibé di'ak malu ona ho lezada. Arguidu primeiravés mai hatan iha tribunál, arguidu nu'udar funsionáriu Ministériu Edukasaun Vikeke ho vensimentu kada fulan US\$150.00.

Aleinde ne'e, lezada mós kontinua konfirma faktu sira iha akuzasaun no deklara katak sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak iha produsaun prova sira, arguidu konfesa totalmente faktu sira iha akuzasaun no konfirma mós husi lezada. Tanba ne'e, konsidera arguidu provadu komete krime hasoru lezada no husu ba tribunál atu aplika pena multa US\$60.00 ba arguidu.

Entretantu, defeza husu ba tribunál atu aplika pena ne'ebé kmaan ba arguidu ho konsiderasaun sira katak arguidu konfesa, arrepende ona ninia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu tuku dala ida iha lezada nia reen-toos, basa dala ida iha lezada nia kanuruk. Tribunál mós prova arguidu foti kadeira no baku dala ida iha lezada nia kanuruk. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunál no nu'udar ema ne'ebé mak iha responsabilidade hodi sustenta família, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

36. Krime rama ambon no arma brankas

Nú. Prosesu : 0063/19. DICMR
Kompozisaun Tribunál : Koletivu
Juis : Dra. Sribuana d. Costa, Dra. Jumiaty Freitas, Dr. José António d. Jesus. Faria
Prokuradór : Dr. Bartolomeu de Araújo
Defeza : Dr. Sergio Lobo Junior (advogadu privadu)
Desizaun : Pena prizaun tinan 4 no absolve

Iha 16 Jullu 2020, Tribunál Distritál Baukau prezide julgamentu leitura akordaun ba krime rama ambon no krime arma brankas ne'ebé envolve arguidu Joao Soares Xavier hasoru Estadu RDTL, iha Suku Wailili, Sub-distritu Baukau Vila, Distritu Baukau.

Akuzasaun Prokuradór

Prokuradór akuza katak iha 12 Feveireiru 2019, iha oras tuku 06:20 dadeer, polisia ba iha arguidu nia uma no husu arguidu ba arguidu nia inan. Arguidu nia inan ba dere arguidu nia odamatan kuartu nian. Momentu arguidu hader mai no polisia tama halo pasa revista iha arguidu nia kuartu no hetan rama ambon hamutuk tolu, katana ida no dima ida.

Prokuradór akuza arguidu kontra artigu 19 (1), 20 (1), no 2 (2) husi Lei Nú. 5/2017 kona-ba Arma Brankas.

Produsaun ba prova sira

Iha prosesu julgamentu, arguidu deklarata katak rama ambon ne'e arguidu hetan iha tinan 2016 iha rate laran no arguidu rai iha uma atu defende-an tanba iha arguidu sira nia fatin grupu seluk

sempre mai halo asaltu. Entretantu katana, arguidu uza ba to'os no diman arguidu uza ba oho animál bainhira presiza.

Alegasaun finál

Prokuradór haktuir katak iha julgamentu arguidu konfesa faktu sira ne'ebé imputa ba nia no deklarasaun katak rama ambon ne'e arguidu rai iha uma dezde tihan 2016, inklui dima no katana, nune'e prokurador konsidera arguidu provadu komete krime ne'ebé akuza ba arguidu. Tanba ne'e, husu ba tribunál aplika pena prizaun tinan lima ba arguidu.

Enkuantu defeza haktuir katak iha julgamentu arguidu konfesa faktu sira ne'ebé imputa ba nia no sasan ne'ebé polísia foti ona ne'e arguidu konfesa katak la ezejuta ba krime ruma. Tanba ne'e, husu ba tribunál absolve arguidu husi prosesu ne'e.

Desizaun

Depoisde avalia faktu hotu, tribunál prova katak arguidu rai rama ambon tolu, inklui dima ida no katana ida. Bazeia ba faktu provadu sira no tetu mós sirkunstánsia atenuante sira, nune'e tribunál konklui prosesu ne'e no kondena arguidu ba krime rama ambon ho pena prizaun tinan haat. Enkuantu ba krime arma brankas, tribunál absolve.

37. Krime dezobediénsia no la halotuir obrigasaun alimentár

Nú. Prosesu : 0068/19. PDBAU
Kompozisaun Tribunál : Singulár
Juis : Dr. José António de Jesus Escurial da Silva Faria
Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Omologa no pena prizaun fulan 3 suspende ba tinan 3

Iha 17 Jullu 2020 Tribunál Distritál Baukau prezide julgamentu leitura sentensa ba krime dezobediénsia no la halotuir obrigasaun alimentár ne'ebé envolve arguidu TFX hasoru nia eis feen no oan, iha Distritu Baukau.

Akuzasaun Prokuradór

Prokuradór akuza katak iha tinan 2016 arguidu ho nia feen moris hamutuk (*uniaun de facto*) no husi moris hamutuk ne'e hetan oan ida no naran IDR. Maibé tanba lezada ho arguidu nia nia uma kain la'ó la di'ak, nune'e sira fahe malu tiha. Iha 24 Jullu 2018, tribunál deside arguidu tenke fó alimentasaun ba menór ka nia oan ne'e ho valor US\$50.00 kada fulan hahú husi Agostu 2018. Arguidu komesa halo tranferénsia ba konta bankária lezada nian hahú iha Agostu 2018 to'o Dezembru 2018. Maibé hahú Janeiru 2019 to'o ohin loron, arguidu la halo tranferénsia ona. Nune'e, arguidu la kumpri dezisaun tribunál nian no la fó alimentasaun tuir dezisaun refere.

Prokuradór akuza arguidu kontra artigu 244 (1) alinea (a) KP kona-ba dezobediénsia no Artigu 225 (1) KP kona-ba la halotuir obrigasaun alimentár.

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa konsiliaun, tribunál halo tentativa konsiliaun ba arguidu no lezada ba krime la halotuir obrigasaun alimentár tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, lezada hakarak deziste nia keixa hasoru arguidu tanba iha konsiliaun arguidu ho lezada konkorda katak komesa Jullu 2020 arguidu sei tranfere osan hamutuk US\$400.00 ne'ebé kobre osan sira ne'ebé tuir loloos arguidu tenke haruka husi fulan Novembru 2019 to'o fulan Juñu 2020. Depoide ida ne'e, tranferénsia ba oin sei la'o hanesan bai-bain ka US\$50.00 kada fulan. Ho nune'e, tribunál omologa tiha pedidu dezisténsia ne'e. Entretantu ba krime dezobediénsia, tribunál kontinua halo prosesu julgamentu.

Produsaun ba prova sira

Iha prosesu julgamentu, arguidu deklara katak iha 23 Maiu 2019, arguidu hetan asidente tráfiku bainhira kondús bis no baku fila iha Gruta Nosa Señora Fatumaka nia oin no rezulta arguidu sofre moras no la bele lori kareta. Tanba ne'e arguidu la iha osan hodi fó ba nia oan ne'e. Arguidu hatutan katak nia foin lori fali kareta kompañia nian iha Novembru 2019, ho vensimentu US\$200.00 kada fulan. Mezmu nune'e arguidu deklara katak durante ne'e seidak simu osan no banihira simu arguidu promete perante tribunál sei transfere osan US\$400.00 ba lezada nia konta bankária. Liutan arguidu hateten katak nia hola ona fetu seluk no iha oan na'in ida.

Entretantu lezada kontinua konfirma faktu sira iha akuzasaun no deklara katak nafatin hein arguidu nia promesa perante tribunál, tanba lezada atual fa'an modo iha merkadu Kelikai hodi sustenta sira nia oan ne'ebé foin tinan rua ho balun.

Alegasaun finál

Prokuradór haktuir katak akuzasaun ne'ebé imputa ba arguidu provadu hotu tanba arguidu la transfere osan tuir desizaun tribunál nian no lezada mós konfirma akuzasaun no deklara mós katak durante fulan hira lezada esforsu-an hodi sustenta sira nia oan ne'e. Bazeia ba faktu sira ne'e hotu, husu ba tribunál kondena arguidu ho pena prizaun tinan tolu supende ba tinan tolu.

Enkuantu defeza husu ba tribunál atu aplika pena ne'ebé adekua ba arguidu ho konsiderasaun katak arguidu para nia responsabilidade tanba hetan dezastre, maibé perante tribunál arguidu promete sei transfere osan US\$400.00 ba lezada nia konta bankária iha Jullu 2020 no sei kontinua transfere osan hanesan bai-bain.

Desizaun

Depoide avalia faktu sira ne'ebé prodús, tribunál prova katak arguidu la halo tuir desizaun tribunál nian hahú husi Janeiru 2019 to'o ohin lora kona-ba tranferénsia osan ba lezada nia konta bankária hodi sustenta nia oan ne'ebé sei menoridade. Bazeia ba prova ne'e no sirkunstánsia sira

hotu, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

38. Krime arma brankas

Nú. Prosesu : 0032/19. BCSIC
Kompozisaun Tribunál : Koletiva
Juis : Dra. Jumiaty Freitas, Dra. Florensia Freitas no Dr. José Q. Soares
Celestino
Prokuradór : Dra. Remizia de Fátima da Silva
Defeza : Dr. Jose Maria Caetano Guterres
Desizaun : Pena prizaun tinan 3 suspende ba tinan 3

Iha 17 Jullu 2020, Tribunál Distritál Baukau prezide julgamentu leitura akordaun ba krime arma brankas ne'ebé envolve arguidu Joao Perreira Gusmao hasoru Estadu RDTL, iha Sub-distritu Vemase, Distritu Baukau.

Akuzasaun Prokuradór

Prokuradór akuza katak iha 25 Maiu 2019, iha oras tuku 18:00 lokraik, akontese konfrontu entre arte marsiais iha Vemasse, nune'e polísia ekipa task force halo patroliamentu to'o iha areia Madoma parte sukaer laran nian. Iha ne'ebá polísia sira haree arguidu tuur hela iha estrada ibun ho kondisaun roupa foer no ain tanan. Ekipa patrolimentu ne'e tun husi kareta no halo pasa revista ba arguidu no konsege hetan keris ida iha arguidu nia kanotak nune'e ekipa polísia kaer arguidu hodi submete ba primeiru interrogatoriu.

Prokuradór akuza arguidu kontra artigu 2 Nú.1 (g) no 20 (1) husi Lei Nú. 5/2017 kona-ba Arma Brankas.

Produsaun ba prova sira

Iha prosesu julgamentu, arguidu konfesa totalmente ba faktu sira iha akuzasaun no deklara katak iha momentu ne'ebá arguidu husi foho ka suku Osowala lori mós ho tudik ho modelu *keris* atu mai iha mate uma ida iha Madoma. Arguidu hatutan katak objetivu arguidu kaer *keris* ne'e atu uza ba koa na'an iha mate uma. Bainhira serbisu hotu ona iha mate uma no atu ba haris iha bee-matan mak to'o iha estrada polísia kaer kedas arguidu. Arguidu esklaresé katak la hatene katak antes ne'e iha konfrontu entre arte marsiais no arguidu mós la envolve iha arte marsiais no arguidu foin primeravés mai hatan iha tribunál.

Testemuña Gil Basilio Correia nu'udar membru PNTL depoimenta katak testemuña nu'udar ekipa tas force husi Komando Baukau ne'ebé iha momentu ne'ebá ba atua konfrontu iha suku Kaikua maibé bainhira polísia to'o iha terenu konfrontu sira halai namkari. Maski nune'e, polísia nafatin halo patroliamentu to'o iha sukaer laran no haree arguidu tuur ho kondisaun roupa foer, ain tanan

nune'e polisia sira para halo pasa revista. Iha pasa revista ne'e polisia hetan tudik ho modelu *keris* iha arguidu nia kanotak no altura ne'e arguidu hatais faru rua.

Alegasaun final

Prokurador konsidera arguidu komete krime ne'ebé prokurador imputa ba nia. Tanba ne'e, husu ba tribunál atu kondena arguidu tuir arguidu nia hahalok ne'e.

Enkuantu defeza haktuir katak arguidu konfesa, koopera ho justisa, nune'e husu ba tribunál atu aplika pena mínimu husi krime ne'e ba arguidu.

Desizaun

Depoisde avalia faktu hotu, tribunál prova katak polisia hetan *keris* ida iha arguidu nia kanotak bainhira polisia ekipa task force halo patroliamentu tanba mosu konfrontu entre arte marsiais. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa ninia hahalok no koopera ho justisa no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu no selu mós kustu judisiál US\$20.00.

39. Krime ofensa ba integridade física simples ho natureza violência doméstica

Nú. Prosesu : 0001/20. BCEVN
Kompozisaun Tribunál : Singulár
Juis : Dr. José Quintão Soares Celestino
Prokurador : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena prizaun fulan 6 suspende ba tinan 1

Iha 20 Jullu 2020, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu TMC hasoru nia feen no oan mane ho idade tinan 20, iha Distritu Baukau.

Akuzasaun Prokurador

Prokurador akuza katak iha 09 Janeiru 2020, iha oras tuku 20:00 kalan, arguidu fila husi natar no haree nia oan mane (lezadu) estraga tiha arguidu nia motor. Ho nune'e, arguidu tuku dala ida iha lezadu MMC nia hasan parte loos no arguidu nia liman kukun kona iha lezadu nia hasan rezulta kanek ki'ik. Arguidu mós riba lezadu ba rai no tebe dala ida iha lezadu nia kotuk laran. Haree ne'e, arguidu nia feen ka lezadu nia inan (lezada) ba satan netik hodi arguidu hapara ninia asaun ne'e, maibé arguidu kontinua basa dala ida iha lezada nia matan-fukun parte karuk hafoin ba hato'o keixa iha polisia no sira kontinua ba hela iha uma Mahon durante semana ida.

Prokurador akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok ne'e. Arguidu mos deklarata katak depoisde akontesimentu ne'e lezada no lezadu ba hela tiha iha uma mahon durante semana ida, hafoin arguidu ba lori sira fila mai uma. Arguidu hatutan mos katak to'o iha uma arguidu husu deskulpa ba lezada no lezada no sira di'ak malu fali to'o agora. Aleinde ne'e arguidu mos deklarata katak nu'udar mestre ho saláriu kada fulan US\$400.00.

Aleinde ne'e, lezada no lezada mos konfirma faktu sira iha akuzasaun no deklarata katak depoisde arguidu ba foti sira iha uma mahon no to'o agora sira di'ak malu.

Alegasaun finál

Prokurador konsidera arguidu provadu komete krime hasoru lezada no lezada no tuir loloos arguidu nu'udar mestre tenke fo ezemplu di'ak ba iha sosiedade, maibe pelu kontráriu. Ho nune'e, husu ba tribunál atu fo pena prizaun fulan neen suspende ba tinan ida nune'e bele prevene arguidu ninia hahalok ne'e iha futuro.

Entretantu defeza haktuir katak iha produsaun ba prova sira arguidu konfesa faktu ho integralmente no arguidu mos foin primeiravés mai hatan iha tribunál, arrepende ona ninia hahalok no di'ak malu ona ho lezada no lezada. Tanba ne'e, husu ba tribunál atu aplika pena admoestasaun ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia hasan parte loos nune'e liman kukun kona iha hasan. Tribunál mos prova katak arguidu riba lezada ba rai no tebe dala ida iha lezada nia kotuk laran. Aleinde ne'e, tribunál mos prova katak arguidu basa dala ida iha lezada nia matan fukun parte karuk. Bazeia ba faktu provadu sira no mos tetu sirkunstánsia atenuante sira hanesan arguidu konfesa, arrepende ona ninia hahalok, primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan haat suspende ba tinan ida.

40. Krime ofensa ba integridade física simples ho natureza violência doméstica

Nú. Prosesu	: 0003/20. BCVMS
Kompozisaun Tribunál	: Singulár
Juis	: Dr. José Quintão Soares Celestino
Prokurador	: Dr. Ambrósio Rangel Freitas
Defeza	: Dr. Jose Maria Caetano Guterres
Desizaun	: Pena multa US\$30.00

Iha 24 Jullu 2020, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LAF hasoru nia feen, iha Distritu Baukau.

Akuzasaun Prokuradór

Prokuradór akuza katak iha 14 Feveireiru 2020, iha oras tuku 16:22 lokraik, arguidu ba tula lezada iha Eskuadra PNTL Vemasse tanba lezada nu'udar membru PNTL no serbisu iha fatin ne'e. Bainhira to'o uma, arguidu save tiha odamatan hotu no komesa diskute malu ho lezada tanba deskonfia lezada amante ho mane seluk. Arguidu hako'ak lezada ho makaas husi kotuk no atu riba lezada ba rai maibé la konsege tanba lezada defende-an.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak problema ne'e sira rezolve ona perante família rua, maibé lezada deside hakarak moris separa ho arguidu to'o agora. Tanba ne'e perante tribunál, arguidu mós hakarak moris separa ho lezada. Arguidu hatutan katak iha oan na'in neen no oan sira ne'e hela ho arguidu. Arguidu mós deklarata katak arrepende ninia hahalok no arguidu nu'udar peskadór ne'ebé fulan ida hetan osan US\$300.00.

Aleinde ne'e, lezadu mós konfirma faktu sira iha akuzasaun no deklarata katak depoisde akontesimentu ne'e sira rezolve ona perante família rua no lezada mak hili hakarak moris separa ho arguidu maibé sira haree hamutuk oan sira.

Alegasaun finál

Prokuradór haktuir katak arguidu konfesa faktu hotu ne'ebé akuza ba nia no konfirma mós husi lezada. Tetu ba sirkunstánsia balun hanesan sira moris separa ona no kondisaun ekonómia arguidu nian, husu ba tribunál kondena arguidu ho pena multa US\$30.00.

Aleinde ne'e defeza haktuir katak arguidu konfesa faktu ne'ebe imputa ba nia no depoisde akontesimentu ne'e família rua konsege rezolve maibé lezada mak hakarak moris separa husi arguidu. Aleinde ne'e, tanba prosesu kleur to'o ohin loron arguidu mós deside perante tribunál hakarak moris separa husi lezada. Mezmu nune'e, arguidu arrepende ona ninia hahalok, foin primeiravés mai hatan iha tribunál, tanba ne'e husu ba tribunál aplika pena ne'ebé justu ba arguidu.

Desizaun

Depoisde avalia faktu hotu, tribunál prova katak arguidu hako'ak lezada ho makaas husi kotuk atu riba ba rai maibé la konsege tanba lezada defende-an. Bazeia ba faktu provadu sira no tetu mós ho sirkunstánsia atenuante sira hanesan arguidu konfesa, arrepende ona ninia hahalok, nune'e

tribunál kondena arguida ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa durante loron 20 prizaun, bainhira arguidu la selu pena multa refere.

41. Krime danu agravadu

Nú. Prosesu : 0009/19.BCSIC
Kompozisaun Tribunál : Koletivu
Juis : Dra. Sribuana da Costa, Dra. Jumiaty Freitas no Dr. José A. Escurial Faria
Prokuradór : Dr. Bartolomeu de Araújo
Defeza : Dr. Sidonio Maria Sarmiento no Dr. Lino Lopes (advogadu ECM)
Desizaun : Absolve

Iha 27 Jullu 2020, Tribunál Distritál Baukau prezide julgamentu leitura akordaun ba krime danu agravadu ne'ebé envolve arguidu Joao Belo Ximenes no Joao da Costa hasoru lezadu Anacleto da Costa Freitas, iha Sub-distritu Baukau Vila, Distritu Baukau.

Akuzasaun Prokuradór

Prokuradór akuza katak iha 26 Janeiro 2019, iha tuku 14:00 lokraik, lezadu hamutuk ho Joao Ribeiro, Ilisio Constantino Gusmão Perreira no Apolinario Ernesto Manuel Correia husi Suku Seisal atu ba tula karau iha Buibau maibé tanba karau la iha nune'e sira kontinua ba iha Samalari. Bainhira fila to'o iha dalan rate Buibau nian, ema taka dalan nune'e sira la bele kontinua la'o. Arguidu Joao Belo Ximenes direktamente taa kareta no inklui arguidu Joao da Costa mos iha fatin akontesementu. Arguidu sira ninia hahalok ne'e rezulta vidru kareta rahun no hamosu prejuizu ba lezadu ho montante US\$1,200.00.

Prokuradór akuza arguidu kontra artigu 259 KP kona-ba danu agravadu ho moldura penál tinan 2 to'o tinan 8 prizaun.

Produsaun ba prova sira

Iha prosesu julgamentu, arguidu Joao Belo Ximenes nega totalmente ba faktu sira iha akuzasaun no dekara katak arguidu iha uma tanba udan boot no hetan kontaktu husi Xefe Suku Seisal katak "*ó iha ne'ebé mak ema baku kanek hotu ona ó nia maun Apolinario ho maluk sira iha rate Buibau nian,*". Arguidu hatan ba xefe suku katak nia iha uma no distansia dook liu ho rate Buibau no transporte mós la iha nune'e arguidu la ba. Iha tempu lokraik, polisia ba kaer arguidu iha nia uma. Momentu ne'e arguidu ho nia feen no arguidu nia rian mak iha uma.

Arguidu Joao da Costa deklarara katak iha akontesimentu ne'e, tempu mós udan no arguidu tuur iha nia uma no haree ba ema balun taka metin hotu oin mak baku kareta refere. Bainhira arguidu hakat ba fatin akontesimentu, ema sira ne'e halai lakon hotu ona.

Enkuantu lezadu deklara katak iha akontesimentu ne'e ema aluga kareta husi Suku Seisal ba tula karau iha Buibau, maibé tanba karau laiha nune'e sira kontinua ba Samalari no iha ne'ebá mós karau laiha nune'e sira filafali no to'o iha dalan rate Buibau nian mak ema tau netik fatuk iha estrada laran no taa au tau netik iha dalan. Lezadu mós deklara katak sira haree ema barak iha estrada inklui arguidu Joao da Costa no derrepente arguidu Joao Belo Ximenes kaer ho samurai mai taa kareta. Ema sira seluk, taka oin metin hotu mak tuda kareta nia sorin-sorin. Lezadu hatutan katak nia koñese arguidu na'in rua tanba la taka oin. Kareta nia vidru ne'ebé rahun ne'e lezadu hadia ona ho osan US\$1,200.00.

Testemuña Joao Ribeiro nu'udar lezadu nia primu depoimentu katak iha akontesimentu ne'e testemuña tuur iha lezadu nia sorin no haree ema taka dalan no haree ema barak mak taka metin oin maibé katuas Joao da Costa (arguidu) hatais jaket mutin mak hamriik de'it la halo buat ida. Testemuña hatutan katak nia haree ema taa kareta maibé la hatene arguidu Joao Belo Ximenes mak taa so haree ema ida taa kareta ne'e ho postura ain as, isin boot, fuuk naruk no taka metin oin ho maskara.

Testemuña Ilisio Constantino Gusmão Perreira nu'udar lezadu nia família depoimenta katak momentu tuur iha kareta kotuk to'o iha areia rate Buibau haree ema tau fatuk iha estrada no ema barak taka metin oin. Enkuantu kona-ba arguidu Joao da Costa testemuña la haree no la koñese tanba suku ketak-ketak ka dook malu.

Testemuña Apolinario Ernesto Manuel Correia nu'udar lezadu nia família depoimentu katak iha akontesimentu ne'e testemuña tuur iha kareta kotuk no haree ema taka dalan no derrepente ema tuda ona kareta. Ho nune'e, testemuña tauk no toba tun tiha iha kareta laran no la haree no la hatene se mak tuda kareta no taa kareta. Bainhira ema para tuda ona mak testemuña ho maluk sira tun no haree arguidu Joao da Costa mak la'o ba hasoru sira maibé la halo buat ida hasoru kareta.

Testemuña Paul da Costa nu'udar ofisiál justisa iha Ministériu Públiku depoimenta katak iha akontesimentu ne'e testemuña ba halo notifikasaun iha Suku Samalari no bainhira fila no liu iha dalan Buibau, besik rate nian testemuña haree kareta para nune'e testemuña husu lezadu ho nia maluk sira no sira dehan katak ema tuda rahun kareta hafoin testemuña kontaktu polísia. Maibé tanba polísia seidaok to'o iha fatin akontesimentu nune'e testemuña direktamente ba informa iha Komando Polísia Munisípiu Baukau.

Testemuña Sabina Gusmao nu'udar arguidu nia viziñu depoimenta katak iha akontesimentu ne'e tanba udan testemuña iha de'it uma no haree arguidu ho nia família mós iha de'it uma tanba sira viziñu ho distansia maizumenus metru rua. Testemuña depoimenta tan katak bainhira testemuña kuda hela ai-funan, polísia mai husu arguidu ba testemuña, nune'e testemuña hatan iha uma laran no ba bolu kedas arguidu ho nia feen hodi hasoru polísia.

Testemuña Abilia Correia Freitas nu'udar arguidu nian feen depoimenta katak iha momentu ne'e udan husi dadeer to'o lokraik nune'e arguidu no testemuña ho nia alin mane sira iha de'it uma maibé iha oras tuku 15:00 lokraik, polisia mosu iha uma no bolu arguidu tanba deskonfia baku rahun ema nian kareta iha dalan besik rate. Testemuna hatutan katak bainhira polisia dehan hanesan ne'e mak sira foin hatene maibé arguidu husi dadeer to'o lokraik la ba fatin ruma tanba udan.

Testemuña Julio Nicolau Hornai Neto nu'udar arguidu nia viziñu depoimenta katak iha oras tuku 13:00 meiodia, testemuña buka nia bibi no haree bibi hamrik iha arguidu nia uma ninin tanba udan, nune'e testemuña ba tuur iha arguidu nia uma no sira konverse halimar to'o tuku 14:00 mak fila ba uma. Liu tiha hafoin arguidu nia feen dehan polisia mai bolu arguidu ba iha Eskuadra Polisia Baukau Vila.

Testemuña Apolinario Nicolau Correia nu'udar arguidu nia rian depoimentu katak testemuña fila husi mate uma no tama ba iha arguidu nia uma tanba nia rian rasik no momentu ne'e hamutuk ho testemuña Julio Nicolau Hornai Neto no sira tuur konverse no han hamutuk. Momentu han hotu, testemuña Julio Nicolau Hornai Neto fila uluk ba nia uma, hafoin polisia mai bolu arguidu.

Testemuña Agus F. Carvalho nu'udar Xefe Suku Seisal depoimenta katak iha akontesimentu ne'e nia simu telefone husi polisia katak comunidade husi Suku Seisal ema baku nia kareta iha Suku Buibau. Ho nune'e, testemuña kontaktu arguidu João Belo Ximenes nu'udar testemuña nia alin ne'ebé hela iha suku Buibau katak ema baku ó nia maun sira no kareta iha suku Buibau besik rate maibé arguidu hatan katak nia iha hela uma depois mak ba tanba udan boot hela.

Alegasaun finál

Prokuradór haktuir katak arguidu nega totalmente ba faktu sira iha akuzasaun, mezmu nune'e lezadu ne'ebé kondús kareta haree rasik ho matan katak ema tau fatuk no au iha estrada klaran no derrepente arguidu Joao Belo Ximenes ne'ebé la taka oin mosu husi rate laran ba taa kareta parte oin no ema barak taka metin oin mak tuda kareta husi sor-sorin no reforsa mós husi testemuña sira seluk nia depoimentu. Tanba ne'e, husu ba tribunál atu kondena arguidu Joao Belo Ximenes ho pena prizaun tinan rua suspende ba tinan rua no absolve arguidu Joao da Costa husi prosesu.

Enkuantu defeza husi arguidu Joao Belo Ximenes haktuir katak bazeia ba produsaun ba prova sira katak lezadu kondús kareta no haree ho matan katak arguidu la taka oin, kesi de'it hena iha kakorok no taa kareta. Testemuña Joao Ribeiro ne'ebé tuur iha lezadu nia sorin deklarata katak haree ema taa kareta maibé la koñese ema ne'e tanba oin taka metin, testemuña sira seluk mós depoimenta katak momentu ne'e udan nune'e arguidu ho família iha deit uma. Haree ba razaun

hirak ne'e, defeza konsidera krime ne'ebé akuza ba arguidu ne'e la provadu. Tanba ne'e, husu ba tribunál absolve arguidu husi prosesu.

Enkuantu defeza husi arguidu Joao da Costa haktuir katak bazeia ba produsaun ba prova sira, parte defeza konkorda prokuradór nia alegasaun katak absolve arguidu husi akuzasaun.

Desizaun

Depoizde avalia faktu hotu ne'ebé prodús durante julgamentu, tribunál konsidera faktu hotu la provadu, nune'e tribunál konkluir prosesu ne'e no absolve arguidu sira husi prosesu ne'e.

42. Krime abuza konfiansa agravadu

Nú. Prosesu : 0006/19. LASIC
Kompozisaun Tribunál : Singulár
Juis : Dra. Florencia Freitas, Dr. José Quintão S. Celestino no Dra. Sribuana da Costa
Prokuradór : Dr. Bartolomeu de Araújo
Defeza : Dr. Wilson Cabral (advogadu)
Desizaun : Pena prizaun tinan 3 suspende ba tinan 3

Iha 28 Jullu 2020, Tribunál Distritál Baukau prezide julgamentu leitura akordaun ba krime abuza konfiansa agravadu ne'ebé envolve arguidu Osorio Soares hasoru lezada Emilia da Costa, iha Postu Administrativu Lautem (Lautem), Munisípiu Lautem.

Akuzasaun Prokuradór

Prokuradór akuza katak arguidu nu'udar lezada nia empregadu no lezada nu'udar diretora ba nia kompañia rasik ho naran JEAMEV Unip, Lda. Tanba arguidu iha koñesimentu kona-ba materiál ró nian, nune'e lezada entrega redi inklui materiál sira ba arguidu atu suku mak hanesan : redi tasi peska nian ho marka pukat nilon kór matak hamutuk falun 14 ho folin US\$1,313.00, pelumpan Y-8 fumindu kór mutin hamutuk 100 ho folin US\$199.74, daun hodi suku redi marka pioneer 1 kór kinur hamutu 4 ho folin US\$3.20 no kabas suku redi ho marka paus brand hamutuk falun 2 ho folin US\$ 21.19. Materiál sira nia folin ho total US\$1,360.090.

Maibé tanba lezada hein kleur liu ona no la iha informasaun ruma husi arguidu kona-ba redi ne'e, nune'e iha 20 Janeiru 2019, iha oras tuku 11:00 meiodia, lezada hamutuk ho Leonardo Amaral no Joao Bosco ba iha arguidu nia uma hodi husu redi ne'e maibé arguidu hatan ba lezada katak "*imi fila deit ona*,". Lezada husu nafatin maibé arguidu la entrega sasan refere nune'e lezada decide ba hato'o keixa iha polísia.

Prokuradór akuza arguidu kontra artigu 257 KP kona-ba abuza konfiansa agravadu ho moldura penál tinan 2 to'o tinan 8 prizaun.

Produsaun ba prova sira

Iha prosesu julgamentu, arguidu deklara katak lezada fó duni materiál sira hanesan temi iha akuzasaun ba arguidu atu suku redi maibé depoisde ida ne'e lezada hamutuk ho arguidu ba sosa ró iha Flores, Indonezia no bainhira to'o Dili, arguidu hetan izame husi lezada atu lori ró ne'e ba iha Atauro. Bainhira filafali mai Dili, mesin ró nian kona iha arguidu nia ain to'o bubu boot no ikus lezada la uza arguidu nu'udar kapitaun (*nakoda*). Arguidu mós deklara katak momentu arguidu ho kondisaun moras hela ne'e, lezada telefone ba arguidu atu entrega ona redi se lae lezada sunu tiha arguidu nia sertifikadu ne'ebé antes ne'e lezada foti no uza hodi sosa ró. Tanba arguidu hatan katak la fó redi ne'e mak lezada ho nia família ba arguidu nia uma atu foti redi maibé arguidu nafatin la fó. Sasan sira ne'e polísia foti hotu ona. Arguidu mós deklara katak arrepende ninia hahalok.

Enkuantu lezada kontinua konfirma faktu sira iha akuzasaun no deklara katak lezada uza duni arguidu nia sertifikadu kona-ba kapitaun nian hodi sosa ró. Momentu ró to'o iha Dili lezada fó ezame ba arguidu hodi koko ró refere maibé lezada haree arguidu la iha esperénsia no kona-ba redi lezada hein kleur maibé la iha informasaun nune'e lezada telefone ba arguidu maibé arguidu koalia barak loos. Ho nune'e, lezada hamutuk ho xefe suku, OPS (Ofisiál Polísia Suku) ba iha arguidu nia uma hodi husu kona ba arguidu nia responsabilidade maibé arguidu haruka lezada no sira seluk fila no dehan katak la presiza sira. Lezada hatutan katak antes entrega materiál sira la halo kontratu no la ko'alia kona-ba bainhira suku hotu atu selu arguidu.

Testemuña Leonardo Amaral nu'udar lezada nia la'en depoimentu katak antes ne'e lezada kontaktu ona testemuña katak atu ba foti redi iha 20 Janeiru 2019, iha Lopalos. Testemuña hamutuk ho lezada, Joao Bosco, xefe suku no OPS ba iha arguidu nia uma maibé bainhira to'o iha ne'ebá testemuña haree arguidu kaer katana no koa'lia ba sira katak "*hau la koñese imi orsida hau tetak rahun imi*", nune'e testemuña mós ta'uk no ba tiha estrada. Testemuña hatutan katak lezada fó materiál ba arguidu atu suku redi ho durasaun tempu maizumenus fulan ida resin maibé ikus mai arguidu la halo tuir.

Testemuña João Bosco nu'udar lezada nia família depoimentu katak momentu ne'e testemuña ba hotu arguidu nia uma tanba antes ne'e arguidu telefone ona ba lezada katak atu rezolve problema presiza testemuña nia prezensa maibé bainhira testemuña ho sira bá, haree arguidu uza fali katana, tanba ne'e mak testemuña ta'uk no filafali ba nia uma. Kona-ba arguidu nia sertifikadu testemuña mak husu arguidu fó ba lezada atu fasilita ba sosa ró no sertfikadu agora dadauk iha hela lezada.

Alegasaun finál

Prokuradór haktuir katak lezada entrega duni sasan ba arguidu atu suku redi maibé ikus arguidu la halo tuir saida mak lezada hateten. Kleur ona lezada kontaktu arguidu maibé arguidu la foti, nune'e iha 20 Janeiru 2019, lezada hamutuk testemuña sira inklui ho OPS bá iha arguidu nia uma

atu husu kona-ba redi ne'ebé arguidu suku. Maibé arguidu hatan ho hirus hasoru lezada ho sira seluk. Antes ne'e, lezada foti duni arguidu nia sertifikadu kapitaun nian hodi uza ba sosa ró refere. Bainhira ró to'o Dili, lezada fó ezame ba arguidu atu lori lezada nia ró husi Dili ba Atauro. Maibé makina ró nian kona fali iha arguidu nian ain no rezulta kanek. Husi ne'e lezada dúvida ho arguidu nia profisaun hanesan kapitaun. Tanba ne'e, husu ba tribunál kondena arguidu ho pena prizaun tinan haat tanba konsidera arguidu provadu komete krime ne'ebé akuza ba arguidu.

Enkuantu defeza husu ba tribunál atu aplika pena ne'ebé adekuadu ba arguidu tanba arguidu konfesa katak lezada fó duni materiál ba arguidu no arguidu konsege suku ona redi hamutuk neen no ualu mak seidauk no sasan sira ne'e agora iha hela tribunál ho kondisaun totalmente di'ak. Arguidu la fó redi ne'e tanba lezada uza arguidu nia sertifikadu ba sosa ró maibé ikus la uza arguidu sai hanesan nakoda. Aleinde ne'e, lezada mós ameasa arguidu liu husi telefone atu suñu arguidu nia sertifikadu. Arguidu arrepende ninia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál konsidera faktu hotu provadu bazeia ba akuzasaun prokuradór nian. Bazeia ba faktu provadu ne'e no tetu mós sirkunstánsia sira hotu, tribunál kondena arguidu ho pena prizaun tinan tolu suspende ba tinan tolu. Enkuantu kona-ba sasan sira ne'ebé polísia prende, fó fila hotu ona ba lezada nu'udar na'in.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>